

明詩紀事

第十一函
第十二冊



明詩紀事

陳氏叢書
聽詩齋藏

光緒癸未都門過夏旅情蕭索取明人詩閱之遂有紀事之
輯至己亥閱十七寒暑錄詩幾四千家分爲十籤凡論明詩
者莫不謂盛於宏正極於嘉隆衰於公安竟陵余謂莫盛明
初若犁眉海叟子高翠屏朝宗一山吳四傑粵五子閩十子
會稽二肅崇安二藍以及草閣南村子英子宜虛白子憲之
流以視宏正嘉隆時孰多孰少也且明初詩家各抒心得雋
旨名篇自在流出無前後七子相矜相軋之習溫柔敦厚詩
教固如是也長安旅食劄劂爲艱先以甲籤三十卷質之同
好至此集以紀事爲名無事可紀者亦廣爲甄錄冀以攬前
哲之芳馥爲後人之貽餉云爾己亥秋杪黔靈山樵陳田

明詩紀事甲籤目

卷一上

太祖 一首

成祖 五首

仁宗 一首

宣宗 三首

英宗 二首

憲宗 一首

孝宗 一首

世宗 一首

神宗 一首

莊烈帝 一首

卷一下

祀社稷異壇同壝樂章 二首

禋享太廟樂章 四首

釋奠先師孔子樂章 六首

宴饗九奏樂章 七首

祀先蠶樂章 二首

大禘樂章 二首



雩祀雲門曲 一首

特享九廟樂章 五首

王國祀仁祖樂章 八首 濂

宋 祭告天地樂章 三首 梁寅

朝會樂章 一首 顧祿

朝會樂章 二首 王景

卷二上

周定王櫛 四首

蜀獻王椿 一首

甯獻王權 二首

漢庶人高煦 一首

周獻王有燬 三首

秦康王志潔 一首

楚憲王季垠 二首

瀋安王詮鈺 一首

秦簡王誠泳 四首

肅靖王真浹 四首

泯靖王彥汰 一首

瀋憲王肩移 三首

德平榮順王肩樞 一首

趙康王厚煜 二首

蜀成王讓栩 二首

武岡保康王顯槐 一首

潘宣王恬焯 二首

鎮康恭裕王恬焯 三首

安慶端懿王恬燿 二首

遼庶人憲燿 一首

益莊王厚燿 一首

潘定王理堯 一首

靖安王新環 一首

穀城王常濫 一首

卷二下

朱安汎 一首 周藩

朱睦樛 二首

朱華圉 一首 楚藩

朱承綵 一首 齊藩

朱觀焜 一首

朱頤媿 十三首

朱憲燮 一首 遼藩

朱儼鑰 一首

朱拱槩 二首 甯藩

朱多熿 五首

朱多炆 八首

朱多燿 一首

朱多燿 一首

朱謀埠 四首

朱謀賢 三首

朱謀堯 二首

朱謀境 四首

朱謀輝 二首

朱謀擘 一首

朱統錚 一首

朱統欽 一首

朱統喙 一首

朱容重 一首

朱肩梢 三首

潘藩

朱肩杻 一首

朱肩枿 一首

朱恬焮 一首

朱理圻 六首

朱理墉 一首

朱理婉 一首

朱理壩 一首

朱效鏃 一首

朱碩爨 四首 唐藩

朱器封 二首

朱常法 一首 益藩

朱慈愆 一首 衡藩

卷三

劉基 四首

汪廣洋 四首

陶安 十首

朱升 一首

孫炎 一首

鮑恂 五首

宋訥 十一首

張以甯 十首

卷四

宋濂 三首

答祿與權 一首

朱芾 三首

史靖可 一首

張唯 一首

方徵 一首

牛諒 一首

朱夢炎 一首

卷五

王禕 二首

吳雲 一首

詹同 一首

吳沈 一首

樂韶鳳 一首

魏觀 七首

錢用壬 一首

危素 二十五首

卷六

胡翰 一首

趙堦 一首

徐尊生 二首

謝徽 二首

朱右 八首

陶凱 一首

曾魯 一首

朱廉 一首

李汶 一首

張孟兼 一首

王彝 一首

張宣 三首

貝瓊 八首

杜寅 一首

呂復 一首

李叔正 一首

卷七

高啟 七首 北郭十子

楊基 四首

張羽 十一首

卷八

徐賁 三首

余堯臣 一首

王行 四首

宋克 一首

呂敏 二首

陳則 一首 十子中尚有釋道衍見乙籤

唐肅 十六首 會稽二肅

謝肅 十四首

卷九

孫蕢 十一首 南園五子

黃哲 五首

王佐 三首

李德 四首

趙介 一首

卷十

林鴻 十八首 閩十子

王恭 二十首

王偁 二十二首

高廷禮 十首

陳亮 二首

鄭定 二首

王褒 二首

唐泰 二首

周玄 三首

黃玄 二首

卷十一

劉崧 二十三首

許伯旅 九首

曹睿 二首

邱民 一首

韓守益 一首

吳琳 一首

趙俶 一首

卷十二

吳伯宗 一首

劉三吾 二首

汪叡 一首

朱善 一首

龔敷 二首

杜敷 三首

吳源 一首

張兌 一首

王嘉會 一首

全思誠 一首

周澣 一首

滕毅 一首

楊訓文 一首

李質 二首

韓宜可 一首

張籌 一首

黃肅 三首

劉紹 十八首

卷十三

袁凱 二十首

蘇伯衡 七首

童冀 二首

申屠衡 二首

張昌 一首

鮑頰 一首

王立中 四首

林公慶 一首

張率 一首

包尼授 一首

涂穎 三首

朱逢吉 一首

金綱 一首

涂幾 一首

鄒矩 一首

吳彤 一首

卷十四

徐一夔 二首

劉承直 二首

周子諒 一首

林弼 八首

張翥 二首

陳世昌 一首

孫作 二首

瞿莊 二首

趙撝謙 一首

張美和 一首

錢宰 三首

揭軌 六首

卷十五

朱同 十三首

鄭潛 五首

秦約 二首

桂彥良 二首

范準 二首

朱模 一首

方時舉 三首

陳觀 一首

劉晟 一首

賀守約 二首

龍玉泉 一首

文魯麟 一首

杜隰 一首

任原 一首

王善慶 一首

吳舜舉 一首

黃思永 一首

蔡景 一首

柯欽 一首

伍衡 一首

王子魯 一首

黃孟良 一首

余師孔 二首

徐松 一首

彭友信 一首

王璵 二首

徐裕 一首

徐禮 一首

陳山 一首

卷十六

藍仁 十六首

藍智 三十八首

王沂 四首

王佑 二首

錢子正 一首

錢子義 一首

陳約 一首

陳緝 一首

林公與 一首

林公存 一首

林公冶 一首

李毓 五首

董佐才 一首

王鈞 一首

張輿 一首

張輅 一首

鄭欻 一首

鄭枋 一首

繆仲琳 一首

黎慎 一首

卷十七

鎰炳 二十二首

甘瑾 十三首

朱弘祖 一首

李鎬 一首

趙迪 一首

劉秩 三首

陳元達 一首

何明遠 一首

張存 一首

諸葛伯衡 一首

魏資政 一首

李純道 一首

李徵 一首

錢復亨 二首

李思齊 一首

卷十八

王蒙 五首

陳汝言 五首

王冕 十四首

張紳 十一首

莘野 一首

吳植 一首

芮麟 一首

袁養福 一首

卷十九

烏斯道 五首

顧祿 四首

浦源 五首

馬琬 一首

史謹 二首

薛穆 二首

虞堪 二首

楊彝 三首

邵誼 一首

朱應辰 一首

王履 一首

宋璉 三首

陳璧 一首

張展 一首

盧熊 三首

馬治 五首

陶琛 一首

董紀 四首

卷二十

張適 二十二首

謝恭 一首

潘仁 四首

邾經 五首

朱繼 三首

遂昶 八首

楊子善 三首

郭櫛 一首

葉見泰 二首

戴奎 一首

鄭元益 一首

卷二十一

沐英 一首

郭奎 十五首

熊鼎 一首

夏煜 一首

吳去疾 一首

陶誼 一首

谷宏 一首

陳潛夫 一首

沈應 一首

蕭翀 一首

白範 一首

周架 一首

練高 二首

史遷 三首

吳文泰 一首

程煜 一首

吳斌 四首

雷燧 一首

葉子奇 四首

卷二十二

胡奎 四十一首

王翰 八首

管時敏 二十一首

林温 一首

貝翱 一首

張璧 一首

桂衡 一首

黃架 一首

羅昭 一首

曹卷 一首

陸闔 三首

陳南賓 一首

卷二十三

陶宗儀 十七首

黎貞 三首

蘭茂 二首

蘭廷瑞 二首

唐貞 一首

梁蘭 五首

姚瓊 一首

韓奕 四首

滑壽 二首

林枝 一首

卷二十四

李曩 五首

蕭執 三首

樓瑄 一首

丁晉 六首

陳謨 六首

唐桂芳 七首

易恆 二首

王賓 一首

陶振 一首

陸中 四首

胡雲端 一首

周昉 二首

鄒奕 一首

陸禧 一首

高輝祖 一首

陳維楨 一首

范再 一首

金居敬 一首

胡安 一首

韓廉 一首

江敬弘 一首

金夢巖 一首

鄭昂 一首

游莊 一首

陳安 一首

王中 一首

顧協 二首

謝林 一首

卷二十五

袁華 二十四首

徐達左 三首

周南 四首

林大同 一首

殷奎 五首

呂旭 二首

朱昇 一首

周启 一首

陳燧 一首

蕭岐 一首

李唐 一首

何彥修 一首

陳謨 一首

夏晔 一首

張庸 一首

俞韶美 一首

王嘏 一首

周所立 一首

林伯璟 一首

卷二十六

張著 二十一首

陳伯康 八首

劉駟 一首

鄭沂 一首

李勝原 一首

王時保 一首

鄒說 一首

富禮 二首

卷二十七

劉瓊 七首

郭鈺 二首

王澤 六首

王旬 一首

戈鎬 二首

俞貞木 六首

薛倫 一首

朱熙 一首

李伯震 一首

徐濟 三首

吳昊 一首

許敬軒 一首

程袞 一首

程彌壽 一首

王興 一首

陳雷 一首

鄭洪 一首

林旅 一首

卷二十八

李延興 二十七首

凌雲翰 九首

鄭真 三首

許繼 十首

郭濬 一首

劉剛 一首

錢岳 一首

劉渙 六首

袁宗彥 二首

卷二十九

王諫 一首

王敬中 一首

林谷顯 一首

馬德華 一首

黃雋 一首

張庭蘭 一首

歐陽貞 一首

任亨泰 一首

陳時舉 一首

俞永 一首

陳郊 一首

卷三十

胡子祺 一首

宋杞 一首

季應祈 一首

范宗暉 一首

林敏 四首

李伯葵 二首

劉仔肩 五首

許中麗 一首

顧田 一首

林原縉 一首

邱海 一首

陳川 一首

程用晦 一首

劉琮玉 一首

章喆 一首

徐顒 二首

葛貞 一首

舒壽童 一首

蕭規 一首

邢沂 一首

林右 二首

胡温 一首

危德華 一首

黃褰 二首

周谷賓 一首

邵光祖 一首

游堅 一首

明詩紀事卷一

貴陽陳田輯

甲籤

太祖一首

太祖姓朱氏諱元璋字國瑞濠州鍾離人元至正十一年辛卯起兵丁未稱吳元年戊申建元洪武在位

三十一年崩葬孝陵有文集五十卷詩五卷

黃瑜雙槐歲鈔洪武八年秋八月上覽川流之不息
陋尹程秋水賦言不契道乃親更爲之賦成召禁林
羣臣觀之且曰卿等亦各撰賦以進宋濂率同列研
精覃思鋪敘成章詣東黃閣次第投獻上皆親覽焉
復寘品評於其間已而賜坐勅大官進天厨奇珍內
臣行觴觴已上顧濂曰卿何不盡飲濂出跪奏曰臣
荷陛下聖慈賜以醕酌敢不如詔第臣年衰邁恐不
勝柸杓志不攝氣或愆於禮度無以上承寵光爾上

曰卿姑試之濂卽席而飲將徹上復顧曰卿更宜酌
一觴濂再起固辭上曰一觴豈解醉人乎卒飲之濂
舉觴至口端又復瑟縮者三上笑曰男子何不慷慨
爲對曰天威咫尺間不敢重有所瀆勉強一吸至盡
上大悅濂顏面變赭頓覺精神遐漂若行浮雲中上
復笑曰卿宜自述一詩朕亦爲卿賦醉歌二奉御捧
黃綾案進上揮翰如飛須臾成楚辭一章曰西風颯
颯兮金張特會儒臣兮舉觴曰蒼柳兮裊娜閱澄江
兮水洋洋爲斯悅而再酌弄清波兮永光玉海盈而
馨透泛瓊斝兮銀漿宋生微飲兮早醉忽周旋兮步
驟踰踰美秋景兮共樂但有益於彼兮何傷濂旣醉
下筆欷傾字不成行列甫綴五韻上遽召濂至命編
脩官朱右重書以遺濂遂諭濂曰卿藏之以示子孫
非惟見朕寵愛卿亦可見一時君臣道合共樂太平
之盛也濂五拜叩首以謝上更勅侍臣應制賦醉學
士歌者四人考功監丞華克勤給事中宋善方徵彭
通聞而續賦者五人秦府長史林温太子正字桂彥
良翰林編脩王珣張唯典籍孫蕡彭與孫皆吾廣人
也

黃佐翰林記太祖嘗出御製詩文以示詞臣太子正
字桂彥良卽於上前大聲誦之琅然左右驚愕學士
承旨詹同私戒之上知之謂曰儒者事君正當誠意

毋事矯揉也

廖道南殿閣詞林記丙午年六月上禱雨鍾山獲應

賦七言喜雨詩命待制黃哲等廣和已而諸將告捷

多令翰林諸臣應制賦詩上親加品評洪武十年十

二月上制十題命典籍吳伯宗賦之援筆立就詞語

峻潔上嘉其才敏賜織金錦衣嘗幸清流關賦詩命

扈從儒臣和之起居注劉季道有治定不教生縱逸

功成猶遣歷間關之句上嘆賞曰可謂安不忘危賜

以白金文綺又起居注蔣子杰應命即物賦咏立成

上大悅特寵賜和章一日命羣儒撰參鶴文吳府伴

讀王驥操觚立就學士宋濂為之進呈上稱善及日

將南至大祀於園邱上復命羣臣賦七言律十二韻

冠以三百言序驥與黃利先成踞讀御榻前上聽畢

加獎勵命進學禁林云

解縉春雨軒集洪武二十有八年北平永清衛之龍

門禾有異莖同穗之祥今上皇帝遣使來進羣臣上

表賀太祖高皇帝親御翰墨為詩一章以賜今上皇

帝其詩首言創業之艱天命之不易除暴禁亂之師

撫民致治之略中言天錫豐登之屢史書垂示之嚴

明堂禋薦之重末示謙冲戒謹之意為善不足之誠

大矜下民之惠與民同樂之盛心滋於言表蓋不以

嘉禾之祥為可矜而以為可懼而思以自勉聖不自

聖兢兢業業足以垂訓於千萬年今上皇帝服膺聖訓念手澤之存諷誦追維不能自已乃永樂三年用摹勒於石拓本裝治成軸分賜諸主及近臣於是臣縉亦得與賜焉

楊慎藝林伐山吾蜀解元王孝忠鄉試賀平西蜀表中有云川四巴三收彈丸黑子之地傅一廖二成大統函夏之天傅一廖二乃太祖御製平西蜀頌中謂傅友德之功第一廖永忠之功第二也人咸服其博洽

董穀碧里雜存宋太史廉乞歸時御製詩二首餞之云白下開尊話別離知君此後迹應稀濂續云臣身願作衡陽雁一度秋風一度歸上悅賜白金縉幣文綺曰與汝作百歲衣也自是歲一朝焉

田按堯山堂外紀洪武十年末學士景濂乞骸骨歸華亭朱孟辨紀其事作詩送之城上春雲煖更飛念卿此地迹應稀臣身願作隨陽雁一度秋來一度歸據此則又為孟辨詩而非太祖與濂賡續也詩亦小有異同

周亮工閩小紀林廷綱洪武初承太祖親擢吏科給事中寵遇日隆嘗侍遊江間殿太祖首唱詩二句曰

江間小殿與雲齊梁上新添燕子泥公承旨足成三聯曰雉尾曉開紅日近龍衣春溼彩雲低旌旗影裏

魏猶息斧鉞門前騏驥嘶簪筆詩成同拜舞太平天子賜新題後賜名恒忠

王世貞藝苑卮言高皇帝神武天授生目不知書既下集慶始厭馬上長篇短歌操筆輒韻有魏武樂府

風制詞質古一洗駢偶之習王世貞弇山堂別集草木子謂上有佳句云烏啼紅

樹裏人在翠微中天下誦之又皇太子新月詩云昨夜嚴陵失釣鈎何人移上碧雲頭雖然未得團圓相

也有清光照九州野史附之謂為太祖及懿文不享國之證草木子乃元遺民國初所著書謂上者順帝

也皇太子者愛猷識理達臘也蓋以其不獲有天下而在東宮頗擅權故記之耳高帝集無此二句

朱孟震續玉笥詩談近有作道聽錄者指黃巢咏菊元梁王曉行之作以為高皇宋人譏高宗養鴿詩載

葉氏草木子而以為武宗北狩書非異聞時非久遠尚謬妄若此况遠且僻哉

田按明史藝文志太祖文集五十卷詩五卷四庫著錄二十卷自漢祖以馬上得天下大風一歌妙合

音節明祖起自布衣與漢合符御製篇章炳為巨集野史所載最為繁雜茲擇其可信者著於編以瞻一

代之風尚焉

題老子廢廟

廟古鴉昏集遙瞻起敬心路幽人迹杳碑偃草叢深度關先
紫氣去後永淪沈惟有庭前樹多年茂作林

成祖 五首

成祖諱棣太祖四子初封燕王靖難兵入革除建文
年號建元永樂在位二十二年崩葬長陵有集

翰林記永樂四年二月上視學服皮弁御宸翰賦長
詩賜太子親王祭酒胡儼司業張智坐講文武三品
以上及翰林儒臣皆賜坐以聽講畢賜茶
何喬遠名山藏文皇御製條達宏遠如萬騎千乘馳
驟植立於平沙大漠之中
弇山堂別集永樂五年授交趾明經甘潤祖等十一
人為諒江等府同知賜勅慰勉仍賦詩一章各送之
沈德符野獲編永樂十一年五月午節車駕東苑觀
擊毬射柳皇太孫擊射連發皆中上大喜射畢進皇
太孫嘉勞之因曰今日華夷畢集朕有一言爾當思

對之曰萬方玉帛風雲會皇太孫卽叩頭對曰一統山河日月明上喜賜名馬錦綺羅紗及番國布因命儒臣賦詩賜羣臣宴

闕里孔子廟詩

巍巍元聖古今之師垂世立言生民是資天將木鐸以教是
異謂欲無言示之者至惟天爲高惟道與參惟地爲厚惟德
與含生民以來實曰未有出類拔萃難乎先後示則不遠日
用攸趨敦序有彝遵於聖模仰惟皇考聖道實崇禮樂治平
身底厥功曰予祇述詎敢或懈聖緒丕承儀憲永賴巖巖泰
山魯邦所瞻新廟奕奕飭祀有嚴鼓鐘鏜鏜璆磬戛擊八音
相宣聖情怡懌作我士類世有才賢佐我大明於斯萬年

田按明代御製闕里孔子廟碑文及詩凡三見成祖此詩其開先也憲宗孝宗詩具後

滿刺加鎮國山詩

西山鉅海中國通輸天灌地億載同沐日浴月光景融兩崖
露■草木濃金花寶鈿生青紅有國於茲民俗雍王好善義
思朝宗願比內郡依華風出入導從張蓋重儀文裼襲禮虔
恭大書貞石表爾忠爾國西山永鎮封山君海伯翕扈從皇
考陟降在彼穹後天監視久益隆爾衆子孫萬福崇

異詩日本壽安鎮國山詩

日本有國鉅海東舟航密邇華夏通衣冠禮樂昭華風服御
綺繡考鼓鐘食有鼎俎居有宮語言文字皆順從善俗殊異
羯與戎萬年景運當時雍皇考在天靈感通監觀海宇罔不
恭爾源道義能廸功遠島微寇敢鞫凶鼠竊蠅嘍潛其蹤爾

奉朕命搜捕窮如雷如電飛蒙衝絕港餘孽以火攻焦流水
上橫復縱什什伍伍禽奸凶荷校屈肘衛以從獻俘來庭口
喁喁彤庭左右誇精忠顧咨太史酬勲庸有國鎮山宜錫封
惟爾善與山增崇寵以銘詩貞石礪萬世照耀扶桑紅

淳泥長甯鎮國山詩

炎海之墟淳泥所處煦仁漸義有順無迂悽悽賢王惟化之
慕道以象譯適來奔赴同其婦子兄弟陪臣稽顙闕下有言
以陳謂君猶天遺其禮樂一視同仁匪厚偏薄顧茲鮮德弗
稱所云浪舶風檣實勞懇勤稽古遠臣順來怒赴以躬或難
矧曰家室王心直誠金石其堅西南番長疇與王賢轟轟高
山以鎮王國鏡文於石懋昭王德王德克昭王國攸甯於萬

斯年仰我大明

柯枝鎮國山詩

截彼高山作鎮海邦吐烟出雲為下國洪龐時其雨陽肅其

煩煇作彼豐穰祛彼妖氛庇於斯民靡灾靡沴室家胥慶優

游卒歲山之嶄矣海之深矣勒此銘詩相為終始

野獲編永樂三年滿刺加國遣使入京求封其山為

一國之鎮上嘉之命封其國之西山為鎮國山上御

製碑文賜以銘詩四年日本國王源道義捕海寇有

功賜白金千兩織金彩色幣二百綺繡衣六十件銀

茶壺三銀盆四及綺繡紗帳衾褥枕席諸物海船二

隻封其國山曰壽安鎮國之山上親製碑文賜以銘

詩六年嗣淳泥國王遐旺還國賜金鑲玉帶一金帶

一金百兩銀三千兩錢鈔錦繡紗羅衾褥帳幔器皿

及王母王叔有差先遇旺父言蒙恩賜爵國之境土

皆屬職方而國有後山封為一國鎮至是其子又請

上命封長甯鎮國之山御製碑文及銘詩先是淳泥

國王麻那惹加耶乃率其兄弟妹男女陪臣來朝上

遣中官宴勞所過諸郡設宴比至上親享之宴其如
於三公府未幾卒于會同館上祭以禮葬安德門外
賜諡曰恭順命其子遐旺襲封因有是請又遣官行
人送歸其國十四年封柯枝國王可赤里爲國王并
封其國中之山爲鎮國山上親製碑文系以詩蓋封
外國山者凡四見皆出睿製詩文以炳耀夷裔且詞
旨雋蔚斷非視草解楊諸公所能辦因思唐文皇兵
力僅伸於漠北而屈於遼水一海夷如文皇帝威德
直被東南古所未賓之國屢曩宏文昭回雲漢其盛
恐萬禴所未有也

仁宗一首

仁宗諱高熾成祖長子建元洪熙在位一年崩葬獻

陵有御製文集二十卷詩集二卷

楊士奇三朝聖諭錄永樂七年贊善王汝玉每日於
文華後殿道說賦詩之法一日殿下顧臣士奇曰古
人爲詩者其高下優劣如何對曰詩所以言志明良
喜起之歌南薰之詩是唐虞之君之志最爲尙矣後
來如漢高大風歌唐太宗雪恥酬百王除兇報千古
之作則所尙者霸力皆非王道漢武帝秋風辭志氣

已衰如隋煬帝陳後主所為則萬世之鑑戒也如殿
下於明道玩經之餘欲娛意於文事則兩漢詔令亦
可觀非獨文詞高簡近古其間亦有可裨益治道如
詩人無益之詩不足為也殿下曰太祖高皇帝有詩
集甚多何為詩不足為對曰帝王之學所重者不在
作詩太祖皇帝聖學之大者在尚書注諸書作詩特
其餘事於今殿下曰世之儒者亦作詩否對曰儒者鮮
可姑綴殿下又曰世之儒者亦作詩否對曰儒者鮮
不作詩然儒之品有高下高者道德之儒若記誦詞
章前輩君子謂之俗儒人主尤當致辨於此
楊士奇東里文集仁廟好文重士樂善有誠時節宴
羣臣間賜詩獎諭悉識以東宮圖書
尹直謇齋瑣綴錄仁廟在東宮時嘗觀二內侍象戲
因命會子榮先生應制詩云興盡計窮征戰罷松陰
花影滿殘杯仁廟和云等閒識得軍情事一著功成
見太平君臣之器量見矣
雙槐歲鈔仁廟潛心經學禮重宮寮文倣歐陽詩尙
選體

名山藏仁宗有典有則模範雅訓不啻學士

冬至賜贊善徐好古

清朝盛文治輔德資儒耆念彼筋力倦趨朝諒非宜賦詩有
佳致納誨多良規起予得深趣歡懷浩無涯新陽屆初復况
此承平時酬勞有樽酒庶以勞期頤

朱彝尊靜志居詩話獻陵天稟純明雅志經術東朝
監國命徐贊善善述纂尙書直旨進講詩成亦命善
述改竄令旨呼其字而不名
阮元石渠隨筆明仁宗楷書今晨覽卿爲余所改之
詩甚是丰采清雋真有益於日新但今卿年邁恐輔
子爲勞似卿材百無一二面諛順顏者比比有之卿
無憚勞弼成子業惟望藥石之言日甚一日毋務犯
鱗觸諱之慮子今欲學作表卿可一如詩題立例具
詩題與表題間日封進以口琢磨皇太子致書贊善
好古先生

宣宗
三首

宣宗諱瞻基仁宗長子建元宣德在位十年崩葬景
陵有御製文集四十四卷詩集六卷樂府一卷

殿閣詞林記宣宗喜為詩初即位起學士李時勉而
 任用之一日幸文淵閣賜諸學士飲呼時勉謂曰卿
 非朕安得飲此酒時勉頓首謝他日賜遊東苑上賜
 時勉酒酌以御甌時勉頓首辭曰臣可與陛下同飲
 不敢同器上悅命易以銀爵既醉上出御製詩俾賡
 之
 藝苑卮言宣宗天縱神敏長歌短章下筆即就每南
 宮試輒自草程式文曰我不當會元及第耶
 弇山堂別集宣廟命陽武侯薛祿等率師築赤城等
 處賜之詩有出車命南仲城齊惟山甫句祿不曉南
 仲山甫以問少傅楊士奇具言之且曰上以古之賢
 將待爾也祿乃拊心感泣
 朱謀聖書史會要宣宗時三楊蹇夏諸賢輔政泰交
 之際常有御製詩歌必親灑宸翰賜之行雲流水飛
 動筆端真天藻也
 朱謀聖畫史會要宣宗萬幾清暇留神詞翰山水人
 物花鳥草蟲隨意所在皆極精妙
 汪珂玉珊瑚網章皇帝聖能天縱一出自然若化工
 之於萬物因物賦形不待矯揉各遂生成敬觀九鷺
 蘆雁二圖柳絲鳥翬細過於髮一種生動之致又居
 然寫意家神逸品

招隱詩

天之生賢道蘊厥身幼學壯行致君澤民伊傅孔孟皆古君
子孜孜行道未嘗忘世秦漢之衰以退爲賢絕類離羣豈非
違天嗟哉若人於世奚補區區百年草木同腐予嗣祖宗統
臨萬邦求賢圖治宵旰遑遑羣才偕來布列在位道行身尊
百世之貴緬彼山林豈無遐遺往而不來悠悠我思漱石枕
流遠引高蹈雖逸於身而悖於道卷阿之思梧桐鳳凰爾其
幡然予將爾揚

減租詩

官租頗繁重在昔蓋有因而此服田者本皆貧下民耕作既
勤勞輸納亦苦辛遂令衣食微曷以贍其身殷念惻予懷故

迹安得循下詔減十三行之四方均先王視萬姓有若父子

親茲惟重邦本豈曰矜吾仁

實錄宣德七年三月庚申勅諭行在部院近年百姓
稅糧遠運艱難官田糧重艱難尤甚自宣德七年為
始但係官田塘地稅糧不分古額近額悉依五年二
月勅諭恩例減免中外該管官不許故違辛酉上退
朝御左順門謂尚書胡濙曰朕昨以官田賦重百姓
苦之詔減十之三以蘇民力嘗聞外間有言朝廷每
下詔蠲租稅而戶部皆不準甚者文移戒約有司有
勿以詔書為詞之語若果然則是廢格詔言壅遏恩
澤不使下流其咎若何今減租之令務在必行書曰
民為邦本本固邦甯有子曰百姓不足君孰與足卿
等皆士人豈不知此朕昨有詩述此意卿當體念勿
忘也

詠撒扇

湘浦烟霞交翠剡溪花雨生香掃卻人間炎暑招回天上清

涼

梅純損齋備忘錄宣廟詩多六言如過史館云蕩蕩堯光四表巍巍舜德重華祖考萬年垂統乾坤六合爲家上林春色云山際雲開曉色林間鳥弄春音物意皆含春意天心允合吾心二詩今人家往往有石刻摹本蓋石不在禁中故人多得之臣又嘗於故家獲觀咏撒扇一首與前二詩皆一視同仁氣象而此一章尤有克治之意大抵皆以天地萬物爲一體真帝王之言也

英宗 二首

毛奇齡西河詩話舊宮中用撒扇合竹骨二十餘黏以藍紗撒大片箔金而以木柄之可收可放自司禮掌印至管事牌子皆得於夏月取用明宣廟御製湘浦烟霞交翠六字詩卽賦此物

英宗諱祁鎮宣宗長子建元正統十四年北狩弟郕

王祁鈺奉皇太后令卽皇帝位改元景泰尊帝爲太

上皇帝景泰元年帝還自北居南宮七年奪門復辟

改元天順八年崩葬裕陵有御製詩文一卷

雙槐歲鈔北京自元建大都已有所謂八景不知何
 人品題至我朝太宗文皇帝因潛淵定天邑當時翰
 林諸儒臣胡廣輩作八景詩傳播海內天順辛巳端
 午節英宗睿皇帝賜文武侍臣以扇有御製七言古
 詩十首凡一百二十言即前所謂八景曰瓊島春
 雲太液晴波薊門煙樹西山霽雪居庸疊翠玉泉垂
 虹蘆溝曉月金臺夕照而益以二景則東郊時雨南
 園秋風也明年壬午亦以端午賜扇扇面御製清暑
 解愠二歌大概言為臣者仰輔上德俯恤民窮助隆
 代天之績云爾蓋國朝賜常朝官扇竹骨銅釘鉸書
 經傳格言以示訓飭越一二日乃召大僚於內殿賜
 象骨銀釘鉸扇然但畫以物象其有御製詩惟此二
 年為然
 田按裕陵御製詩文一册不見傳本予檢廖道南楚
 紀有賜襄憲王瞻塘御製襄陽四景歌云適情細膾
 槎頭鱸洽歡滿泛宜城酒又云無窮風景峴山亭亭
 前數點峰巒青新葉滿林驚綠暗驕陽入戶延朱明
 又云賢王此日多清賞臺榭虛明隔塵鞅瑤階瑩澈
 水晶簾冰簟淨涵雲毋帳又云滿貯寒瓜薦蒼玉細
 分雪藕飛銀絲又云飛螢草際流疏景華月騰輝星
 耿耿廣庭清露滴高槐越苾生涼湘簟冷又云鹿門
 山下行吟客冒冷尋香日幾回詞旨韶令可錄入摘

句圖也

峴山歌賜襄王

於皇祖宗混八方兮裂土而封命同姓兮維予叔父王於襄
兮襄多山川甲諸邦兮有巍者峴禹所荒兮垂千萬年歸我
祖宗不可以爽兮惟澤曰茂惟德曰章燿有光兮保茲峴山
樂無央兮子孫孫子永無疆兮

漢江歌賜襄王

漢江滔滔出蟠冢兮偉茲巨浸壯南邦兮萬有千里流無窮
兮透透迤迤志必東兮於戲漢水殆與天地同始終兮

廖道南楚紀天順四年英宗皇帝御製峴山漢水賦
賜襄憲王以其有奉迎六飛恢復九宸諸疏故嘉賞
焉粵稽諸古大舜卿雲之歌文王鳴鳳之詩太和氤
氲溢于帝藻逮乎漢祖大風之詞霸心猶在唐宗興

慶之詠王迹猶微惟吾皇祖親撰鍾山之賦及閱江詩英廟載製峴山之賦及漢水諸詠直可追軼虞休上嫿姬美豈漢唐諸君所可企及哉

憲宗 一首

憲宗諱見濟初名見深英宗長子建元成化在位二

十三年崩葬茂陵有詩集四卷

名山藏憲宗時御翰墨作為詩賦以賜大臣諸司章奏手自披閱字畫差錯亦蒙清問臣下莫敢或欺珊瑚網憲廟御筆皆神像及金瓶金盤牡丹蘭菊梅竹之類今觀山水小景瀟灑出塵宛然勝國氣韻蓋聖能天縱自各極其妙也

闕里孔子廟詩

天生孔子縱之為聖生知安行仁義中正師道興起從游三千往聖是繼道統流傳六經既明以詔後世三綱五常昭然

不替道德高厚教化無窮人極斯立天地同功生民以來卓
乎獨盛允集大成實天所命有天下者是尊是崇曰性聖道
曷敢勿宗顧予眇躬承此大業惟聖之謨於心乃愜用之爲
治以康兆民聖澤流被萬世聿新報典之隆尤在闕里廟宇
巍巍于茲重美文諸貞石以光於前木鐸遺響於千萬年

田按成化四年六月闕里重修孔廟成茂陵御製碑
文並系以詩八月御製碑亭成衍聖公孔弘緒具表
謝十二年祭酒周洪謨請加孔廟籩豆詔從之增爲
十二遣學士商輅告文廟王獻告於闕里余檢吳寬
匏菴家藏集有曲阜重修夫子廟碑詩云於赫皇明
建國十紀文教誕敷及遠自邇明聖得師維道顧
尊之崇之有樂有禮紛其羽籥錯其簠簋謂此器數
罔愜仰企乃詔有司乃鳩役使乃伐堅石乃削文梓
長廡重門崇簷厚陟剝落以完漫漶以玼革故爲新
衆目改視是成化中兩修闕里孔廟匏菴詩中述及
羽籥簠簋當在十二年增加籩豆後矣

孝宗 一首

孝宗諱祐楹憲宗長子建元弘治在位十八年崩葬

泰陵有詩集五卷

翰林記弘治初上注意講學遣太監戴義傳示聖意
命學士李東陽等各撰詩十首用寓啟沃東陽擬十
題各撰七言律詩一章曰敬天曰法祖曰勤政曰務
學曰任賢曰納諫曰節用曰愛民曰恤刑曰講武上
嘉納焉
靜志居詩話泰陵聖學緝熙德修時敏非惟政事之
勤實啟人文之化置永樂大典於便殿暇即省覽又
命儒臣集歷代御製詩以為規範其賜李東陽靜中
吟一首論者謂同二帝典謨三王訓誥焉
畫史會要孝宗萬幾之暇游筆自娛點刷精妍妙得
形似

闕里孔子廟詩

聖人之生天豈偶然命之大君俾贊化權二帝三王君焉克

聖繼天立極道形於政大化既洽至治斯成巍巍蕩蕩渾乎
難名周政不綱道隨時墜孔子聖人而不得位乃稽羣聖乃
定六經萬世之師於焉足徵自漢而下數千餘歲褒典代加
有隆勿替於皇吾祖居正體元六經是師卓爾化原列聖相
承先後一揆逮及朕躬思弘前軌廟貌載崇祀事孔禋經言
典訓彌謹彌敬俗化治成日升川至斯道之光允垂萬世

李東陽懷麓堂集弘治甲子春正月重建闕里孔子
廟成上親製碑文祝辭遣臣東陽申祭告臣東陽奉
命以閏四月丁卯陛辭癸未至於廟衍聖公臣聞韶
率族人迂於郊遠近大小來會者數百計前三日時
雨降及期雨霽禮成之後星月朗耀神人懽暢歌工
舞佾奉器執事之臣下逮胥吏僕從皆忻忻然如雲
之從風水之赴壑有不令而集者敢紀成事用告來
世

世宗 一首

世宗諱厚煜興獻王子憲宗之孫武宗無子入繼大

統建元嘉靖在位四十五年崩葬永陵有詔學詩一

卷宸翰錄一卷詠和錄一卷咏春同德錄白鵲贊和

集一卷

名山藏世宗中興藩服淹貫經史傑作奇思遠繼高

殿閣詞林記嘉靖八年正月元夕臣道南應制撰燈

詞十五首以進上親製一章云黃道開蓬殿青陽溢

泰穹賞春纔令節養志自慈宮珠佩軒車從霞觴祝

頌同千秋還萬歲物阜與民豐九年七月敬一亭成

上復命儒臣落成錫宴進詩十年演馬環碧殿御製

歌詞賜同遊諸臣和之十三年臣自徽州賜環上親

灑鍾粹宮詞命和之賜金綺有差

弇山堂別集肅廟以禮部尚書席書病目賜詩問之

期以弼亮以刑部尚書趙鑑致仕賜詩送之嘉其止

足皆龍箋御墨天書煥爛真傳家之至寶耀世之盛

事也

野獲編世宗初政每於萬幾之暇喜為詩時命大學

士費宏楊一清更定或御製詩成令二輔臣屬和以
進一時傳為盛事而張璠等用事自愧不能詩遂露
章攻宏誚其以小技希恩上雖不詰責而所出聖製
漸希矣上嘗命一清擬賦上元詩進呈有愛看冰輪
清似鏡上以為似中秋改云愛看金蓮明似月一清
疏謝以為曲盡情景不問而知為元宵矣聖資超悟
殊非臣下所及信乎非一清所及也惜為璠輩所撓
使天縱多能不遑窮神知化耳

欽天頌

予質也昧上荷簡在答貺無由心銘忻戴庚寅仲冬典禮肅
雖惟日長至戒誓肅恭大報皇天庸秉微虔獻以馨齊薦以
蒼瑄禮嚴禋燎樂備黃鍾頓首誠惶仰瞻帝容帝錫洪仁俯
鑒微忱露垂上瑞福敷下民神功惟祖超今邁古遺我小孫
受天之祐立德惟考潛升穹昊延予小子荷天之保寶露降
祥湛湛瀼瀼綴若珠玉津潤甘香注之瑤竚稽首而迓薦于

祖考滋我禾稼承以金觥色溢精瓊呈于慈闈增算延生浩
浩蒼穹錫我年豐朕拜稽首祇謁愚衷蕩蕩昊慈元樞不息
幹運四時惟帝之力曰雨曰暘亶賴穹蒼嘉貺眇昧家國平
康感恩曷已敢爾忝侈夙夜勉修以拜帝祉

神宗 一首

神宗諱翊鈞穆宗長子建元萬厯在位四十八年崩
葬定陵有集一卷

野獲編今上以冲聖御宇張江陵相公進帝鑑圖說
以勸講內列聖哲芳規任愚覆轍二項以寓勸戒自
是益勤史學更命進講貞觀政要至十六年閣臣進
太祖御札在內閣者凡七十餘通上命留內恭藏因
索累朝實錄進覽閣臣對以實錄成時史臣俱會同
焚稿於芭蕉園人間並無底稿惟皇祖世宗特建皇
史窠以藏列聖實錄寶訓但册樣稍廣宜減爲書册
庶便展閱容令中書官謄進陸續上呈上允之由是

金匱石室之藏俱登乙覽矣
于慎行穀城山房集上初卽位好爲大書內使環立
求書者嘗數十紙而外廷臣僚得受賜者惟內閣講
臣而已字畫道勁鸞迴鳳舞時聖齡十餘歲矣丙子
張公位及慎行補入講幄上顧相君曰新講官二人
尙未賜與大字內使已濡墨俟上遂大書二幅賜位
及慎行字畫比賜諸公者稍大莊勁勝前時御齡已
十五矣
續玉笥詩談司禮張維菊人也少侍今上春宮爲予
言上初學詩詠新月云天邊一輪月其形光皎潔可
比聖人心乾坤多照徹帝王氣象宛然二十字中
錢謙益列朝詩集上天藻飛翔留心翰墨每攜太令
鴨頭丸帖虞世南臨樂論米芾文賦以自隨勸學詩
一章御書賜太監孫隆刻石吳中者也內府藏顏魯
公書孝經命江陵相裝潢題識珠囊綈几未嘗一日
去左右喪亂之後朝士以百錢買得之魯公法書精
楷儼如麻姑仙壇每章有吳道子畫精彩映發手若
未觸天球琬琰零落人間矣

灤縣景命殿詩

翼翼京邑灤水滌之璇源遠濬載奠坤維尊靈長樂歡洽重

闡縣縣景命百祿咸宜睠茲湯沐啟瑞集禧周原膺膺寶殿
攸基重門邃閣崇敞透迤仁祠左拱靈宇右麗蕤連棟接鳥
革翬飛虹祥式闡慈念載怡爰及薄海耀景咸熙聖母之德
綏此蒸黎百千萬禩永永無隳

靜志居詩話景命殿在溇縣永樂店萬曆三十六年
勅建為孝定皇太后祝釐俗所稱九蓮菩薩者是

莊烈帝一首

帝諱由檢光宗第五子天啟七年以信王入踐大位

建元崇禎在位十七年寇陷京師殉社稷葬思陵

沈壽世破夢閒談上經營天下十有七年恭儉似孝
文英果類世廟白哲豐下瞻視威嚴聲若洪鍾讀書
日盈寸手書逼似歐陽率更
杜濬變雅堂集烈皇帝作松風二字大不盈尺端勁
軒翥非一時文士筆力所及
吳偉業綏寇紀略崇禎十二年上佩楊嗣昌以督師

輔臣印嗣昌陸辭先期光祿寺設饗於平臺上親爲
之起酌醴命左右肴以飫之者三樂作一小黃門奉
黃封立於旁發之御製七言詩一章鹽梅今暫作干
城上將威嚴細柳營一掃寇氛從此靖還期教養遂
生民嗣昌跪而誦之拜且泣

賜石砮土司秦良玉

蜀錦征袍手製成桃花馬上請長纓世間不少奇男子誰肯

沙場萬里行

宋長白柳亭詩話秦良玉石砮女官也崇禎間帥師
勤王召見御製詩四首旌之按良玉策楊嗣昌邵捷
春必敗可謂洞晰機宜甲申諸將得毋人人巾幗者
乎錦繖夫人繡旗娘子不能專美於前

光緒丁酉貴陽
陳氏聽詩齋刊

明詩紀事卷一下

貴陽陳田輯

甲籤

翰林記吳元年七月乙亥先是命選道童俊秀者充
 樂舞生至是始集上御戟門召學士朱升領之入見
 設雜樂閱試上親擊石磬命升辨識五音升以宮音
 為徵音上曰何乃以宮作徵耶因命樂生登歌一曲
 上復歎曰古者作樂以和民聲格神人而與天地同
 和近世儒者鮮知音律之學欲樂和顧不難耶其後
 命升等撰圜邱方邱樂章而朝享太廟諸樂章則詔
 翰林諸儒臣梁寅等分為之永樂元年九月詔侍臣
 曰皇考功德隆盛祖宗樂章未有稱述爾等其議為
 之於是學士王景等擬述以聞然竟未施行蓋缺典
 也
 靜志居詩話魏樂府不成於曹劉而成於繆襲晉樂
 府不成於潘左張陸而成於傅立宋樂府不成於鮑
 謝而成於何承天北齊樂府不成於蕭愨而成於陸
 印皆屬恨事明洪武樂章率出四學士之筆嘉靖樂
 章率出議禮諸貴人之詞假孝陵改命伯温季迪永

月詩紀事卷一下

陵改命穉欽君采則其辭定遠追奚斯考父之盛不
若按明初郊社黃才伯謂命學士朱升等撰進余檢
田邱方邱樂章告天地樂章是時寅在禮局承詔
梁寅石門集有擬章故有此作則撰樂章當不止寅
分撰郊社宗廟樂章祀樂章顧謹中有擬朝會樂章
一人王子充有擬郊祀樂章六年六月吏部尚書詹同
當亦此時作也實錄洪武四年六月吏部尚書詹同
禮部尚書陶凱製宴享九奏樂章成上之其曲一曰
本太初二曰仰大明三曰民初生四曰聖道成五曰
御六龍六曰泰階平七曰君德成八曰聖道成九曰
樂清甯先是上厭前代樂章率用諛詞以爲容悅甚
者鄙陋不稱乃命凱等更製其詞既成命協音律者
歌之謂侍臣曰所製樂章頗協音律有和平廣大之
意自今一切流俗喧譁淫褻之樂悉屏去之六年翰
林承旨詹同學士樂韶鳳等上所製釋奠先師孔子
樂章又歷代帝王廟成命錢宰撰樂章稱旨此皆可
一制指數也汪朝宗鳳池吟稿有大祀詩末云載歌
廷頌篇庸擬被樂章頗致企羨之意至嘉靖一朝制
周頌篇庸擬被樂章頗致企羨之意至嘉靖一朝制
樂章播諸壇廟朝之二者取其有合雅製其當時擬製

諸篇亦附見於後云

洪武元年祀社稷異壇同墼樂章

崇壇北向明禋方闡有潔犧牲禮因物顯大房載設中情以

展景運既承神貺斯衍

右進俎凝和之曲

高為山林深為川澤崇邱廣衍亦有原隰惟神所司百靈效

職清醴初陳顒然昭格

右大社初獻壽和之曲

實錄洪武元年二月戊申上親祭大社大稷大社設

正位在東配以后土西向大稷設正位在西配以后

稷東向大社大稷位各用玉兩邸幣黑色牲用犢一

羊一豕一籩豆各十簋簋各二釶三后土后稷位並

同但不用玉先期皇帝散齋四日致齋三日先祭一

日設大次於社稷門外之西南向設御位於壇內當

兩壇之北居中南向皇帝服皮弁服備法駕詣大次
 遂省牲視鼎鑊滌漑有司陳設如儀至日清晨諸執
 事官各實尊罍簋豆登銅寶玉帛於筐置祝於
 神位之右車駕至大次太常卿奏中嚴皇帝服通天
 冠絳紗袍樂舞生及諸執事官陪祭官入就位太常
 卿奏外辦皇帝入就位贊禮唱迎神協律郎舉麾樂
 奏廣和之曲贊禮唱請行禮太常卿奏有司謹具請
 行事皇帝再拜皇太子以下在位官皆再拜贊禮唱
 奠玉帛皇帝詣盥洗位搢圭盥悅出圭詣大社神位
 前協律郎舉麾樂奏肅和之曲皇帝跪搢圭上香奠
 玉帛出圭再拜興次詣后土神位前次詣大社壇大
 稷后稷神位前並如大社儀復位贊禮唱進俎協律
 郎舉麾樂奏凝和之曲皇帝詣大社壇大稷后稷神
 俎出圭次詣后土神位前次詣大稷壇大稷后稷神
 位前並如大社儀復位贊禮唱行初獻禮皇帝詣盥
 洗位搢圭滌爵拭爵以授執爵官出圭詣酒尊所搢
 圭執爵酌醴齊以爵授執爵官出圭詣大社神位前
 協律郎舉麾樂奏壽和之曲武功之舞皇帝跪搢圭
 上香祭酒奠爵出圭讀祝官取祝跪讀皇帝俯伏興
 再拜次詣后土神位前次詣大稷壇大稷后稷神位
 前並如大社儀復位亞獻酌益齊樂奏豫和之曲文
 德之舞終獻酌汎齊樂奏熙和之曲文德之舞儀並

同初獻但不用祝獻畢太常奏飲福受胙皇帝詣飲
福位再拜跪搢圭執事官以爵酌福酒跪進皇帝受
爵祭酒飲福酒以爵置於坫奉胙官奉胙跪進皇帝
受胙以授左右出圭俯伏興再拜興皇太子以下皆
再拜大稷壇如之復位贊禮唱徹豆協律郎舉樂
奏雍和之曲掌祭官各徹豆贊禮唱送神協律郎舉
麾樂奏安和之曲皇帝再拜皇太子以下皆再拜讀
祝官取祝奉幣官取幣掌祭官取牲饌詣瘞所置於
坎內皇帝詣望瘞位執事置土於坎實土至半太常
卿奏禮畢駕還大次解嚴

室于
洪武元年祫享太廟樂章

維我皇祖淑後貽謀盛德靈長與泗同流發於孫枝明禋載
修嘉潤如海恩何以酬

右熙祖廟初獻壽和之曲

承先人之德化家爲國母曰予小子基命成績欲報其德昊
天罔極慇懃三獻我心悅懌

天圖右終獻熙和之曲

樂奏具肅神其燕嬉告成於祖亦右皇妣敬徹不遲以終祀

禮祥光煥揚錫以嘉祉

右徹豆雍和之曲

顯兮幽兮神運無迹鸞馭逍遙安其所適其靈在天其主在

室子子孫孫孝思無斁

右送神安和之曲

實錄洪武元年四月丁未裕享大廟德祖皇考妣神位
居中南面懿祖皇考妣神位居東第一
位西向熙祖皇考妣神位居西第一
位東向仁祖皇考妣神位居東第一
位西向居東第二
位西向先期皇帝散齋四日致齋三日
前祭一日皇帝服通天冠絳紗袍省牲視鼎鑊滌漑有司陳設如儀至日清晨皇太子奉迎各廟神主合祭於德祖廟車駕至大次太常卿奏中嚴皇帝服袞冕太常卿奏外辦皇帝入就位贊禮唱迎神協律郎舉

音登

百王

和之

興再

祖神

訖皇

官以

其終

飲福

受爵

自出

洪武六年釋奠先師孔子樂章

具請行事皇帝再拜贊禮唱詩行禮太常卿奏有司謹
 盥洗位搢圭盥悅出圭詣酒尊所搢圭出爵受醴齊以爵
 爵受執事者出圭詣德祖神位前協律郎舉樂奏壽
 授執事者出圭詣德祖神位前奠帛祭酒奠爵出圭俯伏
 和之曲皇帝跪搢圭上香奠帛祭酒奠爵出圭俯伏
 興再拜次詣懿祖神位前次詣熙祖神位前次詣仁
 祖神位前皆如前儀詣讀祝位跪讀祝官取祝跪讀
 訖皇帝俯伏與再拜復位贊禮唱行亞獻禮各掌祭
 官以爵受酒尊於神位前樂奏豫和之曲文德之舞
 皇帝再拜終獻樂奏熙和之曲文德之舞儀同亞獻
 其終獻樂舞則四代共之贊禮唱飲福受胙皇帝詣
 飲福位再拜跪搢圭執事官以爵酌福酒跪進皇帝
 受爵祭酒飲福以爵置於坫奉胙官奉胙跪進皇帝
 受胙以授左右出圭俯伏與再拜復位贊禮唱徹豆
 協律郎舉樂奏雍和之曲掌祭官各徹豆贊禮唱
 送神協律郎舉樂奏安和之曲皇帝再拜讀祝官
 取祝奉幣官取幣各詣燎所贊禮唱望燎皇帝詣望
 燎位執事者以炬燎火柴半燎贊禮唱禮畢皇太子
 奉神主還各廟駕還大次解嚴

月時已事卷一下

四

大哉宣聖道德尊崇維持王化斯民是宗典祀有常精純益
隆神其來格於昭聖容

右迎神咸和之曲

自生民來誰底其盛惟王神明

惟王後改
曰維師

度越前聖黍帛具

成禮容斯稱黍稷非馨惟神之聽

右奠帛甯和之曲

大哉聖王實天生德作樂以崇時祀無斃清酤惟馨嘉牲孔
碩薦羞神明庶幾昭格

右初獻安和之曲

百王宗師生民物軌瞻之洋洋神其甯止酌彼金罍惟清且
旨登獻惟三於戲成禮

右亞終獻景和之曲

犧象在前豆籩在列以享以薦既芬既潔禮成樂備人和神

悅祭則受福率遵無越

右徹饌咸和之曲

有嚴學宮四方來宗恪恭祀事威儀雍雍歆格惟馨神馭旋

復明禋斯畢咸膺百福

右送神復奏咸和之曲

實錄洪武六年八月翰林承旨詹同侍講學士樂韶鳳等上所製釋奠先師孔子樂章禮部尚書牛諒復以所定禮儀進其儀前祭一日太常司官奏某月遣官祭先師孔子齋一日次日清晨皇帝服皮弁服御奉天殿傳制遣官是日獻官承制畢往祀所省牲將祭樂舞生就位執事分獻陪祭官各就位引贊引獻官就位典禮唱迎神典樂舉麾奏咸和之曲獻官以下各四拜典禮唱奠帛行初獻禮典樂舉麾奏宵和

之曲獻官詣盥洗所搢笏盥手出笏典樂舉麾奏安
和之曲文德之舞獻官詣酒尊所執事者以爵受酒
獻官詣大成至聖文宣王神位前跪搢笏奠帛獻爵
出笏執事者取祝跪讀訖獻官俯伏與平身次詣充
國邨國沂國鄒國公神位前皆如上儀復位典儀唱
行亞獻禮典樂舉麾奏景和之曲執事者以爵酌酒
奠於神位前典儀唱行終獻禮行分獻禮其終獻禮
典樂舉麾奏景和之曲儀同亞獻亞終舞皆同初獻
典儀唱飲福受胙獻官詣飲福位跪搢笏執事者以
爵進獻官飲福酒執事者以胙進獻官受胙出笏俯
伏與平身復位再拜分獻官及陪祀官皆再拜典儀
唱徹饌典樂舉麾奏咸和之曲執事者各詣神位前
徹饌典儀唱送神典樂舉麾奏咸和之曲獻官以下
皆四拜典儀唱讀祝者捧祝掌祭官捧帛饌各詣瘞
所獻官詣望瘞位禮畢制曰可

洪武十五年重定宴饗九奏樂章

田按實錄洪武十五年正月朔上御奉天殿受朝賀
宴羣臣於謹身殿初上命儒臣重制侑食九奏樂章
至是大宴始奏用之一奏炎精開運之曲二奏皇風
之曲三奏眷皇明之曲四奏天道傳之曲五奏振皇

綱之曲六奏金陵之曲七奏長楊之曲八奏芳醴之
曲九奏駕六龍之曲考明制大宴凡四一大祀慶成
大宴一萬壽聖節大宴一冬至大宴一正旦大宴皆
用此樂章朱氏詩綜但題作慶成宴樂章非其實也
永樂十八年重定宴饗樂章一奏上萬壽之曲二奏
仰天恩之曲三奏感地德之曲四奏民樂生之曲五
奏感皇恩之曲六奏慶豐年之曲七奏集禎應之曲
八奏永皇圖之曲九奏樂太平之曲亦是四大宴通
用至嘉靖間續定慶成宴樂章則專用於慶成宴矣

炎精開運篤生聖皇大明御極遠紹虞唐河清海宴物阜民
康威加夷獠德被戎羌八珍有薦九鼎馨香鼓鐘鏜鏜宮徵
洋洋怡神養壽理陰順陽保茲遐福地久天長
右一奏炎精開運之曲

皇風被八表熙熙聲教宣時和景象明紫宸開繡筵龍袞耀
朝日金鑪裊祥煙濟濟公與侯被服麗且鮮列坐侍丹宸馨

折在周旋羔豚升華俎玉饌充方圓初筵奏南風繼歌賡載
篇瑤觴欣再舉拜俯禮無愆同樂及斯辰於皇千萬年

右二奏皇風之曲

赫赫上帝眷我皇明大命既集本固支榮厥本伊何育德春
宮厥支伊何藩邦以甯慶延百世澤被羣生及時爲樂天祿
是膺千秋萬歲永觀厥成

右三奏眷皇明之曲

馬負圖兮天道傳龜載書兮人文宣義畫卦兮禹疇敘皇極
建兮合自然綿綿歷數歸明主祥麟在郊威鳳舞九夷入貢
康衢謠聖子神孫繼祖武垂拱無爲邁前古

右四奏天道傳之曲

周南詠麟趾卷阿歌鳳凰藹藹稱多士爲楨振皇綱赫赫我
大明德尊踰漢唐百揆修庶績公輔理陰陽峩冠正襟佩都
俞在高堂坐令八紘內熙熙民樂康氣和風雨時田疇見豐
穰獻醴過三爵歡娛良未央

右五奏振皇綱之曲

長楊曳綠黃鳥和鳴菡萏呈鮮紫燕輕盈千花浥露日麗風
清及時爲樂芳尊在庭管音嘒嘒絲韻泠泠玉振金聲各奏
爾能皤皤國老載勸載懲明德惟馨垂之聖經唐風示戒永
保嘉名無已太康哲人是聽

右七奏長楊之曲

夏王厭芳醴商湯遠色聲聖人示深戒千春垂令名惟皇登

九五玉食保尊榮日昃不遑餐布德延羣生天庖具豐膳鼎
鼐事調烹豈但資肥甘亦足養遐齡達人悟茲理恆令五氣
平隨時知有節昭哉天道行

右八奏芳醴之曲

明會典洪武二十六年定大宴儀是日尙寶司設御
座於奉天殿錦衣衛設黃麾於殿外之東西金吾等
衛設護衛官二十四員於殿東西教坊司設九奏樂
歌於殿內設大樂於殿外立三舞雜隊於殿下光祿
司官設酒亭於御座下之西膳亭於御座下之東珍
羞醢醢亭於酒膳亭之東西設御筵於御座之東西
設羣臣四品以上位於殿內之東西設羣臣酒尊食
卓於殿外設五品以下位於殿外卓於東西兩廊司
各供乃事引禮引羣臣殿外東西相向立儀禮司跪
奏請升座駕興大樂作升座鳴鞭樂止鳴贊引文武
官四品以上由東西門入殿中橫班北向立五品以
下官列於殿外丹墀北向立樂作贊四拜樂止光祿
司官進御筵大樂作捧案至御前樂止進花樂作進
訖樂止光祿司官開爵注酒捧詣御前進第一爵酒

教坊司跪奏一奏炎精開運之曲贊內外官皆跪教
 坊司跪奏進酒飲畢贊眾內外官俯伏興樂作贊四
 拜平身樂止贊各就位序班隨進羣臣卓散花樂作
 散訖樂止序班即進羣臣蓋第二爵酒教坊司跪奏
 二奏皇風之曲樂作光祿司官斟酒御前序班隨斟
 羣臣酒教坊司跪奏進酒候皇帝舉酒羣臣以次舉
 飲訖樂止光祿司官進湯鼓吹響節前導至殿外鼓
 吹止殿上樂作羣臣起立光祿司官進湯御前羣臣
 復位序班即供羣臣湯樂止教坊司跪奏進湯樂作
 候皇帝舉箸羣臣次舉皇帝進湯訖贊饌成樂止武
 舞入教坊司跪奏平定天下之舞廣六寸朱質上
 左執干戈長三尺五寸闊一尺二寸五寸朱質上
 畫雉羽中畫升龍雲氣右秉戚戚長二尺五寸殊紅
 漆柄金妝戚斧分為四行每行八人舞作發揚蹈厲
 坐作擊刺之狀皆冠黃束髮冠紫紛纓青羅生色
 畫舞鶴花窄袖衫白生絹襯衫領紅羅銷金大袖
 窄袍紅羅銷金裙阜生色畫衣沿襪白羅銷金汗袴
 藍青羅銷金沿紅絹攏項紅結子紅絹束腰塗金束
 帶青絲大絛錦臂鞲綠雲頭卓靴舞師二人執旌以
 引之旌長七尺五寸殊紅漆柄金龍吞口懸五色羽
 九層每層用塗金寶蓋紅絲絛穿末垂絲結子皆冠
 黃金束髮冠紫紛纓青羅大袖衫白絹襯衫領紅羅
 黃金束髮冠紫紛纓青羅大袖衫白絹襯衫領紅羅

月寺已事卷一下

八

金束帶綠雲頭卓靴舞畢出第三爵酒教坊司跪奏
 三奏眷皇明之曲樂作進酒如前儀樂止教坊司跪
 奏舞安四夷之舞舞士十六人東夷四人推髻於後
 繫紅銷金頭繩紅羅銷金抹額中綴塗金博山兩旁
 綴塗金環明金耳環青羅生色畫衣大袖衫紅生色
 領袖紅羅銷金裙青銷金裙緣紅生絹襯衫錦領塗
 金束帶烏皮鞋西戎四人間道錦纏頭明金耳環紅
 紵絲細褶襖子大紅羅生色雲肩綠生色沿藍青羅
 銷金汗袴紅銷金沿繫腰合鉢十字泥金數珠五色
 銷金羅香囊紅絹擁項紅結子赤靴南蠻四人綰紅
 朝天髻繫紅羅生色銀錠紅銷金抹額明金耳環紅
 織金短襖子綠織金細褶短裙絨綿袴子間道紵絲
 手巾泥金項牌金珠纓絡綴小金鈴錦行纏泥金獅
 蠻帶綠銷金擁項紅結子赤靴北狄四人戴單于
 冠貂鼠皮簷雙垂髻紅銷金頭繩紅羅銷金抹額諸
 色細褶襖子藍青生色雲肩紅結子紅銷金汗袴繫
 腰合鉢卓皮靴四夷各為一行舞作拜跪朝謁喜躍
 俯伏之狀舞師二人執幢以引之幢長七尺五寸
 紅漆柄金龍吞口懸五綵羅幢五層每層綴五色銷
 金吹帶末垂紅粉結子皆戴白捲簷帽塗金帽頂
 一撒紅纓紫羅帽襟紅綠金繡襖子白銷金汗袴藍
 青銷金沿塗金束帶綠擁項紅結子赤靴舞畢出

禮記

卷之

第

四

節

禮

記

卷

之

第

四

第四節酒教坊司跪奏四奏天道傳之曲樂作進湯

如前儀食畢教坊司跪奏車書會同之舞舞士三十

二人左執籥籥長一尺五寸五寸五寸五寸五寸五寸

綴雉羽五層每層用塗金寶蓋紅絲縑穿末用紅綠

結子分為四行每行八人舞坐作進退舒徐揖讓升

降之狀皆冠黑光描金方山冠青紛纓衣素紅羅大

袖衫紅生絹襯衫錦領紅羅擁項紅結子塗金束帶

白絹大口袴白布襪茶褐鞋舞師二人執翻以引之

翻長七尺五寸五寸五寸五寸五寸五寸五寸五寸五寸

用塗金寶蓋紅絲縑穿末垂紅絲結子冠服與舞士

同惟大神衫用青不用紅羅項紅結子舞畢出第五

嘉

爵酒教坊司跪奏五奏振皇綱之曲進酒如前儀飲

畢教坊司跪奏百戲承應舞畢出第六節酒教坊司

跪奏六奏金陵之曲進酒進湯如前儀教坊司跪奏

八蠻獻寶進呈舞畢出第七節酒教坊司跪奏七奏

湯

十

上

開

口

上

龍

金

龍

口

上

禮記卷之四

四

供羣臣飯教坊司跪奏進膳食訖贊膳成樂止光祿
司官收膳訖教坊司跪奏百花隊舞承應舞畢出鳴
贊唱撤案序班撤羣臣卓訖光祿司官即撤御案贊
宴成羣臣皆出席向北立序班即撤羣臣座殿外官
皆詣丹墀北向立贊鞠躬樂作贊四拜與平身樂止
羣臣分東西立儀禮司跪奏禮畢駕興大樂作鳴鞭
百官以次出

嘉靖九年祀先蠶樂章

載舉清觴蠶祀孔明以格以享鼓瑟吹笙陰教用彰坤儀永

貞神之聽之鑒此禋誠

右亞獻順和之曲

神之格思桑土是宜三縑七就惟此繭絲獻禮有終神不我

遺錫我純服藻繪皇儀

右終獻宵和之曲

范守己肅皇外史初夏言清理皇莊事竣疏言宜將
負郭官莊改為親蠶廠種植桑柘以備蠶事戶部覆
議不合而止嘉靖九年二月郊祀言奉命分獻南海
因而有感遂疏請舉親蠶禮帝嘉納之勅戶部建壇
尚書梁材上言宜建於皇城南內或西內堪備蠶事
帝曰周禮耕蠶分於南北郊其蠶於禁中唐人便安
之制不可為法於是禮部尚書李時等請行於北郊
酌治蠶之禮定壇墼之向制采桑之器擇掌壇之官
翟車出入或從東華門或從元武門用謹厚內臣用
肅宮禁帝從之命翟車出入由元武門其壇制殺先
農什一建具服殿蠶室繭館俱如古制仍於西內營
織堂以終蠶事

明會典嘉靖九年初建先蠶壇於北郊歲春擇日皇
后躬祀先蠶行親蠶禮十年改築壇於內苑致祭行
親蠶禮齋戒前期三日尚儀奏致齋三日內執事並
司贊六尚等女官及應入壇者各齋二日正祭先一
日蠶宮令陳樂女生位於壇南設皇后拜位於壇下
北向次公主次內命婦次外命婦拜位俱異位重行
北向設內贊位於壇南設司贊位於皇后拜位之東
西設司賓位於外命婦班之北東西相向皇后至壇
所入具服殿少憩司賓先引外命婦列於先蠶壇下
東西相向以北為上尚儀請皇后前奏請皇后易禮

於惟皇祖肇創丕基鍾祥有自曰本先之奄有萬方作之君
師追報宜隆以申孝思瞻望稽首介我休禧

右迎神元和之曲

木有本兮水有源人本祖兮物本天思報德兮禮莫先仰希

鑒兮敢弗虔

右初獻壽和之曲

田按嘉靖十年帝以禘義詢大學士張璁令與侍講
學士夏言議言撰禘義一篇獻之大意謂自秦漢以
來封建之制廢無世家譜謀不明莫知其祖所自出
若必欲強求其人其事穿鑿如唐之以明為祖則又非
必欲強求其所以忍為謹推明古典采酌先儒精微之
孝子慈孫之所忍為謹推明古典采酌先儒精微之
論宜為虛位以祀帝深然之會中允廖道南謂朱氏
為顓頊裔請以太祖實錄為據禘顓頊遂召禮部以
言道南二疏會官詳議大學士璁首言虛位者求
之虛則失之無言顓頊者求之遠則失之誣惟禘德

祖為當羣臣以璵言為是帝意主虛位令再議言復
疏論禘德祖有四可疑德祖自開國以來享始祖之
祭舊矣今又以為所自出之帝是不過強易置其名
耳且禘以德祖祫以太祖則懿熙仁三祖既不得相
從於禘又不得降從太祖於祫是廢三祖之祭也帝
併下其章諸臣乃請設虛位以禘皇初祖南向奉太
祖配西向禮部上大禘儀注前期告廟致齋三日備
香帛牲醴如時享儀至日行禮如大祀圜邱儀樂章
迎神元和之曲初獻壽和之曲亞獻仁和之曲終獻
德和之曲徹饌太和之曲送神永和之曲

嘉靖十一年雩祀雲門曲

景龍精兮時見測鵲緯兮宵懸肆廣樂兮鏗鉤列皇舞兮躡
躡祈方社兮不莫薦圭璧兮孔虔需密雲兮六漠霈甘澍兮
九元慰我農兮既渥錫明昭兮有年

靜志居詩話嘉靖十一年禮臣等議曰郊以禮為重
雩以樂為主合照圜邱樂舞之數以四方之色成樂
舞之服庶稱古人盛樂皇舞之制兼請三獻禮成之
後九奏樂止之時命詞臣隲括雲漢詩詞別製雲門

一曲使文武之士青衣執羽並舞而合歌之乃定議
迎神奏中和之曲奠帛奏肅和之曲進俎奏咸和之
曲初獻奏壽和之曲亞獻奏景和之曲終獻奏永和
之曲徹饌奏凝和之曲送神奏清和之曲望燎奏大
和之曲祭畢使道童歌雲門之曲

嘉靖十五年九廟特享樂章

禮畢樂成神悅人宜籩豆靜嘉敬徹不遲穆穆有容秩秩其
儀益祇以嚴矧敢斲於斯

右太祖廟徹饌豫和之曲

於維文皇重光是宣克戡內難轉坤旋乾外讐百蠻行八
埏貽典則於子孫不忘不愆聖德神功格於皇天作廟奕奕
百世不遷祀事孔明億萬斯年

右成祖廟迎神太和之曲

明明我祖盛德天成至治訏謨遙駿有聲專奠致享惟古經
是程春祀有嚴以迓聖靈惟陟降在庭以資我思成

右仁廟迎神太和之曲

宣廟英廟憲廟同

樂比聲歌佾舞婆娑稱彼玉爵酒旨且多獻享惟忠神聽以
和孝孫在位受福不那

右仁廟終獻甯和之曲

宣廟英廟憲廟同

列祖垂統景運重熙於惟孝皇敬德允持用光於大烈化彼
烝黎專廟以享經禮攸宜俎豆式陳庶幾來思

右孝廟迎神太和之曲

武廟迎神亦同此曲惟易於惟武皇昭德敕威用翦除奸凶大

業弗隳四句

田按明初作四親廟於宮城東南各為一廟德祖居中懿祖東第一熙祖西第一仁祖東第二皆南向洪武八年改建太廟為同堂異室之制中室奉德祖東

一室奉懿祖西一室奉熙祖東二室奉仁祖皆南向
 建文卽位奉太祖南向成祖遷都建廟如南京制宣
 殿神主居西二室南向成祖座次仁祖西向寢殿神
 德元年奉成祖廟正殿神座次仁祖西向寢殿神
 主居東第三室南向二年仁宗廟正殿神座次仁祖
 祖南向寢殿神主居西第三室南向其後大行廟
 皆以次居東西室孝宗卽位憲宗將升廟時九廟已
 備禮臣謂德祖視周后稷不可祧憲宗升廟當祧懿
 祖宜於太廟寢殿後別建祧殿如古夾室之制歲暮
 則奉祧主合享如古祫祭之禮帝從其議其後奉祧
 皆倣此嘉靖初既尊皇考爲睿宗獻皇帝特立世廟
 繼又以皇考專享世廟而成祖以下不得專廟以祀
 於心未安十五年新廟成特建成祖以下七廟改世
 廟爲睿廟合太廟而九定九廟特享儀此樂章所謂
 專廟以享紀其事也至二十四年又罷特廟之祀

王國祀仁祖廟樂章

皇圖聿崇茅社受封禮分雖異孝思則同緬懷世德源深流

鴻報本有祀式昭神功

獻辭 右迎神瀆和之曲

王國之東清廟翼翼奉我皇祖享祀弗忒薦以牲牷敢曰充
膺神其迪嘗純嘏是錫

右奉牲慶和之曲

皇祖載德既淳且仁弗耀其身委祉後人睠茲藩服典祀維
寅清醴方薦歆其苾芬

右初獻保和之曲

穆穆靈宮庭燎有煒貳觴載升神其樂止其樂伊何錫我繁
祉磐石之宗本支百世

右亞獻清和之曲

神兮下臨陟降在庭不見其形如聞其聲洽風肅然達於兩

楹禮成之終神保攸宵

禮其右終獻成和之曲

神具醉止威儀孔肅曰爾孝孫來飲爾福介爾眉壽膺爾百
祿子孫保之以引以續

右飲福咸和之曲

禮備樂舉祀事攸宜孰其尸之廢徹不遲皇哉神惠覃及我
私靈氛將逝如何無思

右徹豆嘉和之曲

杳兮忽兮神運無迹鸞馭上征星流颯疾其靈在天其主在

室億萬斯年孝思無斁

右送神德和之曲

明集禮親王祭仁祖廟儀前期王散齋四日致齋三日
日前祭一日典祠啟王服遠遊冠絳紗袍典儀典祠
導引王省牲視鼎鑊祭日清晨典祠啟王服冕服典
儀典祠導引王入就位司禮唱迎神樂工奏澹和之
曲司禮唱行禮典祠啟行事鞠躬拜興平身司禮唱
奠幣行初獻禮樂工奏保和之曲復位司禮唱行亞
獻禮樂工奏清和之曲復位司禮唱飲福受胙復位司禮唱徹
奏成和之曲復位司禮唱送神樂工奏德和之曲
豆樂工奏嘉和之曲司禮唱司禮唱送神樂工奏德和之曲
司禮唱望燎樂工奏口口之曲典祠啟禮畢導王還
次

擬祭告天地樂章

仰明明瞻巍巍如事父粟以夔物莫稱德曷報之酌用陶匏
斯其宜

右上帝酌獻

明詩紀事卷二

貴陽陳田輯



田按明史藝文志集部稱各藩及宗室自著詩文集
 已見本傳不載及檢本傳良不盡然蓋史館編纂時
 以王鴻緒史藁為底本史藁藩王宗室自著詩文集
 散見於本傳中故志文云然明史於本傳削去詩文
 集名僅存一二體例簡嚴史法應爾但於藝文志內
 未及將所削詩文集名補入而史藁所稱本傳已見
 不載原文亦未刪去今將明史所載宗藩集名及史
 所未載而見於史藁並四庫總目各家書目總集
 專集雜載所述備列於此以待參考秦藩簡王誠泳
 賓竹小鳴藁十卷王孫敬鎮自吟亭詩草敬鑑梅雪
 軒詩藁四卷誼斗有集晉藩慶成榮懿王慎鍾太霞
 藁寶善堂藁二卷周藩憲王有燉誠齋錄新錄鎮平
 恭定王有曠德善齋詩集鎮國中尉陸樛陂上集二
 十卷輔國中尉陸橫奉國將軍勤胤王孫朝壘三世
 詩合為三業集楚藩莊王孟烷勤有堂詩集憲王季
 現毓秀軒集武岡保康王顯槐少鶴山人集十六卷

王孫華園梅湖桃溪集齊藩王孫慶槩籜冠集魯藩
 靖王肇輝憑虛藁惠王泰堪悔齋藁莊王陽鑄尊德
 堂藁鎮國中尉頤塚赤霞館集安邱奉國將軍頤壩
 立同館集王孫頤墟市隱堂集六卷蜀藩獻王椿獻
 園集定王友垓有集十卷惠王申鑒惠園集成王讓
 栩長春競辰集十六卷端王宣圻端園集代藩靈邱
 榮順王遜烜雲溪藁王孫俊格天津集襄垣王孫俊
 嘯佩蘭集肅藩靖王真淤星海集遼藩簡王植有集
 庶人憲燿味祕草堂集輔國中尉術均綦組堂集鎮
 國將軍憲燮哀黍離詩憲燿鄧中御史集光澤榮端
 王寵濃博文堂藁王孫儼鑰句曲山人詩甯藩獻王
 權采芝吟靖王奠培仙謠卻埽吟擬古詩建安奉國
 將軍拱樋瑞鶴堂集石城王孫拱挺巢雲集四卷鎮
 國中尉謀璋枳園近藁王孫謀晉羔雁淹留蕪城巾
 車四集端昌鎮國中尉多煥支離市隱集鎮國中尉統鐵
 用晦集樂安中尉多煥支離市隱集鎮國中尉統鐵
 適園詩集面壁齋文集弋陽輔國將軍拱檜負初集
 二卷奉國將軍多煌委蛇集奉國將軍多烜五遊劄
 遊集甯國王孫謀堯享筭集謀境擊轅集容重初吟
 草藩藩安王詮鈺凝齋集憲王胤移清秋唱和集保
 和齋藁宣王恬焮綠筠軒藁定王理堯修業堂崇玉
 山房藁沁水康僖王理堦衡漳藁滄海披沙集鎮國

塞齊金

將軍恬爍振菴集鎮國將軍恬焯達菴集輔國將軍
理圻怡真亭藁輔國將軍程瑀玉田集奉國將軍效
鏃立攬齋盤秀山房集清源莊簡王幼圩飲河集二
十五卷續集八卷王孫胤杻重瞳老人集德平榮順
王胤樾集書樓藁安慶端懿王恬燿嘉慶集鎮康恭
裕王恬焯西巖漫藁奉國將軍效鏞壺峯集唐藩成
王彌錦夔天小藁恭王彌鈞謙光堂詩集秋江詞三
城康穆王芝垵進修藁承休昭毅王彌振存齋樂府
復齋錄新野鎮國中尉碩燭巨勝園集輔國中尉器
封巢園集漢庶人高煦擬古感興詩趙藩康王厚煜
居敬堂集十二卷荆藩富順王厚琨東蘄集二卷樊
山王栩紙廣讌堂集二十四卷王孫載垵大隱山人
集衡藩新樂康憲王載璽樓居田居藁夢翫神覽集
益藩莊王厚焄勿齋集詠史詩王孫常澗防露館藁
總集則中尉觀樞輯海岳靈秀集新樂王載璽輯諸
藩著述為綺合繡揚集中尉謀埒輯藩藻麟角集明
藻詩菁英

周定王櫛

四首

王太祖第五子洪武三年封吳十一年改封周洪熙

元年薨有元宮詞一卷

名山藏王好學能詞賦工書從上所賜元嫗得聞元宮中事製元宮詞百章時人以比之三輔黃圖

田按定王賦元宮詞百篇永樂時獻頌九章頗著文采嘗登天桂清香之樓俯瀚雲之亭召從臣曾子禎

鄒爾思周是修同遊子禎獻賦云惟吾君之英姿兮瑩琮琬而含章稟天然之上智兮尤博學以無方爾

愚賦云效姬旦之屬屬兮若不勝乎捧持既承順而上安兮亦友于而下施是修賦云倣東平之為善兮

慕河間之執清培玉潢於萬世兮臻百福而長榮王答賦云繫三臣之進言兮俱有倫而有理飭先後與

始終兮將啟沃乎吾志彼聲色與畋遊兮固非吾之所尚暨神仙之杳冥兮多徒勞於夢想文宴從容不

減梁園故事王有十五子憲王有燉博學善書鎮平王有曠工詩歌書畫周是修芻蕘集稱郡王殿下和明本中峯梅花百咏詩清雅端潔惜今不傳

元宮詞

蜜漬金桃始獻新禁城三伏絕囂塵炎蒸微至清甯殿玉杵

敲冰賜近臣

侍從皮帽總姑麻
罽罽高冠勝六珈
進得女真千戶妹
十三嬌小喚茶茶

奎章閣下文詞盛
太液池邊遊幸多
南國女官能翰墨
外間

鈔得竹枝歌

隊裏惟誇三聖奴
清歌妙舞世間無
御前供奉蒙深寵
賜得

西洋塔納珠

蜀獻王椿 一首

王太祖第十一子
洪武十一年封
二十三年就藩成

都永樂二十一年
薨有獻園集

田接獻王儒雅好學
孝陵呼爲蜀秀才
嘗奉命講武
中都闢西堂延名士
李叔荆蘇伯衡等
商權文史叔

荆名鎬以字行臨川人洪武戊辰與伯衡同主會試伯衡為叔荆作先考北廬墓誌甚致推挹余甄其詩錄別卷王之國後聘漢中教授方孝孺為世子傳傾懷下接嘗與孝孺書云公西州之冠冕有識者無不心悅誠服而新學晚生亦有所依歸也余一日不見有如三秋又云懿文清節有東漢之風尙志立言為當代之重詞旨雅令如此惜獻園集不傳

西晉 賜方教授詩

伊昔開東閣相看眼獨青文章奏金石衿佩覩儀型應世遊
三輔焉能困一經前星垂炳耀染翰侍彤庭

奎章 宵獻王權

二首

微小知 王太祖第十七子洪武二十四年封二十七年就藩

大宵永樂三年移南昌正統十三年薨有采芝吟四

茲逢

名山藏王白哲美髯負氣好奇嗜學博古自其髻齧

茲逢

時自稱大明奇士老號癯仙所論著及於卜筮修煉

近皇

琴奕諸書手製博山鑪及古瓦硯皆極精緻

近皇

列朝詩集王侍靖難功頗驕恣多怨望不遜作日蝕

近皇

詩云光浴成池正皎然忽如投暮落虞淵青天俄有

近皇

星千點白晝爭看月一弦蜀鳥亂嗁疑入夜杞人狂

近皇

走怨無天舉頭不見長安日世事分明在眼前以此

近皇

詩徵之王之怨望信矣又作囊雲詩云蒸入琴書潤

近皇

粘來几榻寒小齋非嶺上弘景坐相看王每月令人

近皇

往廬山之巔囊雲以歸結小屋曰雲齋障以簾幙每

近皇

日放雲一囊四壁氤氳如在崑洞余觀周憲王有送

宮詞

人高與

新選昭儀進御來女官爭簇上平臺宮中未識他名姓都把

花名作字猜

忽聞天外玉簫聲花下聽來獨自行三十六宮秋一色不知

何處月偏明

何處月偏明

雙槐歲抄 耀仙宮詞 忽聞天外玉簫聲 一絕王司綵

宮詞瓊花移入大明宮 旖旎濃香入晚風 嬴得君王

留步輦玉簫 嘹唳月明中 是時賢妃權氏順妃任氏

昭儀李氏婕妤呂氏美人崔氏皆朝鮮人 權尤穠粹

善吹玉簫 永樂八年侍上征虜 還至臨城 薨諡恭獻

朝鮮國王李芳遠 驛送妃父權永均 至拜光祿寺卿

食祿不管事 尋遣歸國 貢女不復至 聖德剛明不為

蠱惑如此

漢庶人高煦 一首

庶人成祖第二子 永樂二年封漢王 十五年就藩宣

德八年 叛降庶人 紖逍遙城 死國除 有擬古感興詩

擬古

武皇藉文景民 殷倉粟 陳不守清淨 化開邊政多門 四方屢

遊幸 萬里馳三軍 有子不自保 哀哉真少恩 外虛仁義名 奈

茲多欲 身神仙在何處 茂陵今幾春

周憲王有燉

三首

王周定王長子太祖孫洪熙元年襲封景泰三年薨

有誠齋錄新錄諸集

朱謀瑋藩獻記憲王好文辭兼工書畫
書史會要憲王集古名迹十卷手自摹臨勒石傳世

名曰東書堂法帖
沈德符顧曲雜言周憲王所作雜劇最夥名誠齋樂

府雖警拔稍遜古人而調入絃索穩叶流麗猶有金
元風範

列朝詩集憲王遭世隆平奉藩多暇製誠齋樂府傳
奇音律諧美流傳內府至今中原絃索多用之李夢

陽沐中元宵絕句云中山孺子倚新妝趙女燕姬總
擅場齊唱憲王新樂府金梁橋外月如霜王詩如春

日云深巷日斜巢燕急小樓風靜落花間春夜云彩
檻露濃垂柳溼珠簾風靜落花香秋夜云梧桐露滴

鴛鴦瓦楊柳風寒翡翠堂牡丹亭書景云鶯囀小
院穿青柳燕蹴飛花過粉牆日暮云林鳩喚友常知雨

海燕將雛不避人雲林清趣云采藥一僧雲外去巢
松雙鶴雨中還送人云南浦斷虹收雨去西風新雁

帶霜來漫興云南國音書歸雁盡西園風雨落花愁
和王長史云採得藥苗還竹徑著殘棋子坐花陰紅
心驛云枕上夢迴鶯語滑窗前風定柳陰涼橫隄晚
望云神如秋水十分淨心似中原萬里平皆風華和
婉風颯乎盛世之音也

雲英

雲英何處訪遺蹤空對陽臺十二峯花院無情金瑣合蘭房
有路碧苔封消愁茶煮雙團鳳榮恨香盤九篆龍腸斷端清
樓閣裏墨痕燭炆尙重重

列朝詩集雲英姓夏氏憲王之宮人也生五歲闇誦
孝經七歲盡通釋典淡妝素服色藝絕倫其居曰端
清閣有端清閣詩一卷年二十二卧病求為尼以了
生死受菩薩戒作偈示眾而卒憲王自為誌銘

柳枝歌

蘇小門前萬縷垂白家園內雨三枝聽歌看舞人何在惟有

東風展翠眉

送雪

天山一色凍雲垂
罨畫樓臺綴玉時
準備煖金香盒子
明朝

送雪與相知

列朝詩集汴中風俗每歲遇初雪則以合子盛雪送與親知以為喜慶置酒設席相請歡飲亦昇平之樂事宮中尤尚之

秦康王志潔 一首

王隱王尚炳第三子愍王棟之孫太祖曾孫宣德三

年以富平王進封景泰六年薨有默菴集

送凌漢章還茗

東書孤劍別西秦
紅樹青山潑眼新
千里風塵雙短鬢
五湖

煙水一閒身夢回孤館寒砧急望入遙空候雁賓料得紀行
多賦詠雲箋無惜寄陽春

楚憲王季琨二首

王莊王子太祖曾孫初封武陵王正統五年襲封八

年薨有毓秀軒集

楚紀王務學時敏嘗夢持水晶筆大書自茲文藻煥
發詩調高曠題東平圖云東平昔賢王居家惟樂善
富貴非所樂忠誠意無倦讜言契宸衷奏疏答天眷
永言躡芳蹤千載繼成憲河間圖云我聞河間賢懋
學由好古心契羲皇奧神遊洙泗浦求書留其真道
術言有補九原不可作百世吾疇與至今士林多誦
之所著有毓秀軒詩維藩清暇錄管延枝爲之序

昭王碑詩

高皇奉天大正四海肅肅昭王維皇之子茫茫江漢爰初賜

履秉德執誠以綏以理温温靖恭翼翼小心惟孝顓顓惟忠
湛湛臨下惟和蒞眾惟欽允文允武如玉如金奕奕楚邦寔
奠南紀時敘物豐風厚俗美瑤琨在園帝嘉其賢民受厥祉
忠祀有虔嗚呼祖考陟降在天錫監垂祚裕我後昆

莊王碑詩

懿我楚國王祖肇封爰及王考帝訓是崇仰惟帝訓子孫矩
度保國安民式由皇路啟之承之念茲在茲宜我家國世濟
光熙江漢朝宗藩翰攸峙天監厥衷用錫我類閔予小子嗣
守家邦允懷繼述夙夜匪遑峩峩昭園莊園在側穹碑有辭
用示無極

潘安王詮錄

一首

潘安王對會新太師文選時桂靈川

王莊王幼學次子簡王模曾孫太祖玄孫初封靈川
 王正德四年薨諡榮毅後以孫憲王胤柝進封更諡
 安有凝齋稿
 送五臺山僧明曉
 曉來法席尙餘香雲水悠悠道路長錫杖撥開三晉雪衲衣
 披盡五臺霜經傳般若談偏熟禪入維摩語並忘若到深心
 三昧地應知無處覓行藏

秦簡王誠泳 四首

王惠王公錫子康王孫太祖來孫自號賓竹道人弘
 治元年以鎮安王襲封十一年薨有經進小鳴稿十

卷

四庫總目誠泳詩古體清淺而質樸近體諧婉可誦七絕尤為擅場如秋夜詩云霽月滿窗明似晝梧桐如雨下空庭又云空庭久坐不成寐明月滿階砧杵聲又山行詩云嗚鳥無聲僧入定半巖風落紫藤花皆風骨戍削往往有晚唐格意爾時館閣之中轉無此清音矣

殊甚

列朝詩集王年十歲康王如陳教以小學日記唐詩一章惠王聞吳人湯潛名能詩請為教授傳聲律之

學嗣

位日賦一詩積三十年王醕雅有簡押博通羣書布衣蔬食延攬文儒竟日談論不倦護儀子弟得

入翼

宮自王始也詩曰賓竹小鳴集嘉靖元年王孫定王惟焯表上之詔送史館

田按

秦簡王詩色麗音婉不愧日課一詩之目

隴頭吟

萬里奔馳隴頭水日夜鳴鳴亂人耳黃沙白草兩茫茫怕聽水聲愁欲死一從結髮戍涼州鐵甲磨穿已禿頭兒孫養得解胡語不如隴水解東流

春詞

海棠枝上鵲聲乾
羅幕重重護曉寒
初日半林珠露重
脆紅無數壓闌干

題王舜畊畫

翠壁丹厓淡夕曛
往來麋鹿自成羣
仙家住在空青外
只隔桃花一片雲

秋夜

秋聲溢耳不堪聽
燕坐高齋戶半扃
霽月滿窗明似晝
梧桐如雨下空庭

肅靖王真淤

四首

王恭王貢錄之子
太祖來孫莊王模
玄孫成化中封

謝世子嘉靖五年薨以子定王弼枕襲王追諡有星海

謝世子嘉靖五年薨以子定王弼枕襲王追諡有星海

下猶轉

名山藏靖王真淑博雅好文善為詩

列朝詩集靖王詩調高古言邊塞事尤感慨有意

塞上

李陵望國臺猶在蔡琰悲笳怨未窮獵騎遙遙入霜霧鷓鴣

泉外夕陽紅

受降城外單于獵温宿營邊漢使過强欲從軍事鞍馬馮唐

已老復如何

遠出漁陽北擊胡將軍談笑挽雕弧千金底購單于首贖得

沙場戰骨無

徐渤筆精肅藩靖王博雅善詩塞上曲遠出漁陽一篇有王龍標之致

春日田家

屋後青山門外溪小橋遙接稻秧畦人家遠近蒼煙裏桑柘

陰陰戴勝嘯

岷靖王彥汰 一首

王莊王梗玄孫太祖來孫初封江陵王弘治十三年

襲封嘉靖二十三年薨

李制贈廖道南

負比神仙翰苑清更無荆棘向人生覆甌名位稱良史補袞

才猷輔聖明視草綵鸞揮翰集宣麻棠鵲蹴花鳴槐廳風靜

聽鈴索一室焚香愜素情

潘憲王肩栒 三首

王惠王勛潛之子安王孫簡王來孫太祖舅孫自號

南山道人嘉靖五年封靈川王十年以懷王絕嗣進

封二十年薨有清秋唱和集保和齋詩五卷

謝榛四溟詩話憲王南山素嗜談禪詩亦妙悟和懶
雲上人韻曰幽徑斷行蹤浮圖對遠峯結冰堅碧沼
凝雪老青松雙樹下開講千燈中現容天空雨花徧
門有白雲封使王摩詰見之亦當心服詩韻罕用腥
字胡曾洞庭湖絕句魚龍吹浪水雲腥造句儘佳憲
王夜雨頌聯樹溼鴉羣重雲低龍氣腥格律尤勝若
甯獻王懼仙周憲王誠齋雖皆嗜詩相去懸絕矣
程之昭潞安詩抄前篇南山道人性喜讀書好文士
善音律

聞陵川有警

猖獗山中寇農桑殊可悲黃巾還自敗白馬竟何之烏合枯
林夕魚遊沸鼎時材官幾籌策况有射雕兒

送趙一卿僉憲之蜀

纔得相逢便欲行，維舟論別限嚴程。
雲山遠隔黃牛峽，風雨深迷白帝城。
斷石荒臺唐故壘，懸崖殘壁漢遺營。
知君素有忠良節，過此甯無感慨情。

次李黃崖寄懷韻

西望關門道路長，十年萍梗歎行藏。
夢中樽酒人如昨，天外鴻聲秋又涼。
老去客身頻出塞，曉來衙吏罷升堂。
商州更在千山裏，政簡看書懶下牀。

德平榮順王盾櫜一首

王藩憲王弟自號南岑道人嘉靖三十七年封萬歷
十年薨有集書樓稿

四溟詩話南山南岑伯仲齊名

王鴻緒橫雲山人史藁德平王僧樾淵鬱負雋才與

宗人衡府新樂王載璽周府中尉陸樾襄垣府俊隤

晉府康衢秦府玉華齊名俊隤著五懷詩述其事

贈別素愚上人

釋子來何處廬山復太行翻經淹歲月補衲犯冰霜浩劫塵
緣盡彌天覺路長智珠原不染好去照殊方

趙康王厚煜 二首

王成祖第三子趙簡王高燧之來孫自號枕易道人

正德十六年襲封嘉靖三十九年薨有居敬堂集

田按王文采麗都延接士類藻韻連翩應教疊作讀
孫太初之集恨不同時奏謝茂秦之歌擁姬出拜至
今談者津津豔流口齒斯極朱邸之風流藝林之韻
事也

送句吳茂才顧聖少北上

北去度滹沱春風一騎過入燕投刺少留趙著書多明月頻
呼酒青天獨放歌他時望南國湖上有煙蘿

擬出塞

都護行邊日胡天雪正飛朝傳青海檄暮解白登圍龍虎行
韜略風雲入指揮何當請長組生繫犬戎歸

蜀成王讓栩

二首

王昭王賓瀚之子太祖曩孫正德五年襲封嘉靖二
十六年薨有長春競辰稿十六卷

列朝詩集蜀自獻王後四葉皆有文集行世昭王仁
厚好儒術孝宗皇帝賜詩以河間禮樂江夏忠勤爲
比王好學手不釋卷日觀經史臨法書作詩屬對皆
有程要

擬古宮詞

睥睨鴉喧曙色明麗譙隱隱盡鐘聲各宮裝束焚香候只恐

君王道院行

靜志居詩話宮詞雖題擬古然只恐君王道院行疑
諷永陵而作

內池春水鴨頭綠上苑晨花腥血紅蜂蝶叢花鴛戲水一齊
著意向東風

武岡保康王顯槐

一首

王楚端王榮滅第三子昭王來孫太祖昴孫嘉靖十
七年封萬曆十八年薨有少鶴山人正續集十六卷

俞憲盛明百家詩少鶴山人雅善文墨尤好詩歌

送杜學諭擢國子先生

江天歲晚雪初晴有客鳴珂上帝京楚士久知宗杜佑胄師

今得見陽城橋門壁水環經席驛路梅花擁去旌誰謂儒官
稀樹立熙朝冢宰頌文清

潘宣王恬爇

二首

王憲王次子太祖仍孫自號西屏道人嘉靖二十一
年襲封萬曆十年薨有綠筠軒稿四卷

四溟詩話西屏道人詩辭雅氣暢造詣不凡
名山藏宣王好學工古文辭妙於聲律

寄懷大司馬郭一泉

二首

在昔論文卽見知幾年良晤信難期停雲北極頻回首落木
西風獨賦詩金鼎鹽梅殷相業玉階劍履漢官儀君今選將
清邊徼畫省憂心退食遲

征驂別後幾登樓極目山川憶舊遊晶晶霜華寒已冱冥冥

雲物夕仍留九關甲士圖功日三輔丁男習戰秋聞道天驕
還北遁萬年佳氣繞皇州

鎮康恭裕王恬焯 三首

王濬憲王第五子自號西巖道人嘉靖三十一年封

萬曆八年薨有西巖漫稿

四溟詩話鎮康王西巖詩最得盛唐格律題宋參政
瞻遠樓云江流懸樹杪山色到窗中精拔有骨陪國
主謁瑩途中有作云仗劃浮煙破旗衝過鳥翻句法
森嚴何異沈宋

送程太守存齋之任睢陽

八月一日天沈寥使君南發馳星輶雙旌何悠悠五馬亦蕭
蕭駢筵出祖擁溪橋橋邊楊柳垂長條欲言不言各踟躕西
風嫋嫋吹征袍睢陽雄峙梁宋郊兩歧五袴成歌謠公衙寂

寂畫簾捲白日皎皎青天高蹇余久欽道義重與君况是金
蘭交一日不見心已思詎忍咫尺千里遙握手送君還留君
側身南望空鬱陶

寄懷劉紫山侍御回自滇南

桄榔幾度感花開鄉國傳書不易來曾醉離亭牽我夢因思
佐郡識君才滇南風壤三年盡天北星槎萬里迴遙望舊知
秋欲杪月明何處是行臺

四月八日過昭覺禪院同諸宗丈賦得松字

石龕幡影閃金容此日曾聞浴九龍心印始歸香象迹法輪
更斷野狐宗風傳鐘磬留空谷天落雲霞拂古松傑閣還登
一西望萬年佳氣暖諸峯

安慶端懿王恬燿 二首

王藩憲王第七子自號西池道人嘉靖三十七年封

萬曆二十二年薨有嘉慶集

四溟詩話安慶王西池詩奇崛有骨善用險韻譬如
棧道馳馬無異康衢韓翃秋夜卽事星河秋一雁砧
杵夜千家西池重九前一夜樹聲喧一枕秋色冷千
家此聯與韓出一杼織組自別
潞安詩鈔前編西池道人樂善忘勢海內名人樂與
之游立葆真亭八子會每當佳辰招呼宴集彈琴對
奕飲酒賦詩
田按西池攬秀閣中秋宴集詩摘辭走天馬吐論集
人龍想見賓客之盛

送月泉上人歸南海

閒身無所繫江海信孤帆石上留金偈人間祕玉函天開達
摩井雲護普陀巖誰復爲禪侶相依松與杉

送程太守存齋之任睢州

秋滿橋梁柳尚垂一樽千里別君時
雲霄盛世看騰踏風雨
茅堂幾夢思汴水澄清知善政
嵩山迢遞入新詩
懷人儻有瓊瑤字回首天涯雁正飛

遼庶人憲燿一首

庶人遼莊王致格子簡王勗孫太祖仍孫初封句容
王嘉靖十九年襲封隆慶二年以罪降庶人國除有

味祕草堂集

朱國禎湧幢小品遼王國於荊州府嘉靖中庶人憲
燿聰明絕世行多縱佚當之以叛劾疏中有觀兵八
里山之說傳致其獄過也被執月餘飲酒賦詩了不
為意行之日表辭毛太妃血淚淋漓全表皆溼表既
上如故也惟語袁太守曰公知吾好文墨多致文房
四寶去見者無不哀之

錢希言遼邸紀聞世廟時遼邸最盛宮室苑囿聲伎
狗馬之樂甲於諸藩而王亦風流好文音曲詞章梟
盧擊踞靡不狎弄離宮別館霧縠雲蒸舞榭歌樓金
鋪繡澀於是四方之墨卿賦客博徒酒人黃冠羽服
驥子魚文之流無不鱗集其座上矣世宗宴駕國亦
遂除遼王好營宮室置亭院二十餘區以美人鐘鼓
充之其名有西樓西宮曲室華房太乙竹宮有月榭
紅房花坊藥圃雪溪冰室鶯鳴虎圈又有塔橋龍口
西疇草湖藻珠洞宮人斜諸處縣延包絡參差蔽虧
琪花瑤草異獸文禽靡不畢致王曰與諸名士觴詠
其中是時信州宋登春吾吳顧聖少諸君凡數十輩
皆為王門珠履與故荆守徐宗伯公倡和上元諸曲
徐有西宮隱隱出鸞簫之句傳誦一時然遼王雅工
詩賦尤嗜宮商其自製小詞豔曲雜劇傳奇最稱獨
步有春風十調唾窗絨誤歸期玉闌干金兒弄丸記
皆極婉麗才情尋後安置鳳陽又編撰賣花聲諸詞
數百闕流傳江表含思淒楚不減南唐後主春意闌
珊至今章華臺前老妓半是流落宮人猶能彈出箜
篋絃上一曲伊州淚萬行也
田按庶人所著詩有名庚申稿者徐學謨序云逸材
命世蘊藉今古對客揮毫一伸紙卽千數百言立就
一時騷壇之士莫能難今檢學謨海隅集云此序爲

某宗人著蓋禍發後削其名也方禍未發時鷺池生
宋登春爲王門客時永陵好道憲憚以崇事立教封
爲清微忠教真人登春作宮中行樂詞云小紅亭子
白闌干入道宮娥玉作冠袖出青梅彈鸚鵡銀瓶滿
注蔗漿寒碧殿春深瑤草肥美人對月舞羅衣夜來
不作青鸞夢化作彩雲何處飛玉輦春遊夜未央紫
衣侍史謾焚香黃金瓶十樣鸞箋寫道經太乙紫壇朝帝
琉璃硯水黃金瓶十樣鸞箋寫道經太乙紫壇朝帝
罷蒞珠深殿彩花馨又紀南樂應教云沙市多新館
章華餘舊臺細雲薰岸柳殘雪照江梅楚舞花鈿麗
吳歛寶瑟催清尊宜落日作賦子雲才又賞雪侍讌
應教云狐白煖蒙茸當歌集上公春藏金屋裏僊隱
玉壺中送酒青樓妓焚香白玉童錦屏寒不入只許
隔簾櫳可謂一時詞客之雄及禍作登春作遼小紀
於憲憚無恕詞失詩人忠厚之旨矣

望龍山

桓公展高宴乃在龍山巔大會文武士冠蓋相周旋誰知孟
參軍天質任自然墮帽了不驚請筆詞翩翩茲風已千載朝

市幾遞遷山前有故邑
化作陌與阡我欲矯雙鳥
荆棘誰可攀延伫發長嘅
萬壑生塞煙

益莊王厚焜 一首

王端王祐檳子憲宗孫嘉靖二十年襲封三十五年

薨有勿齋集詠史詩

登山

晉散王曾統太師雲冠萬壑十爭巽桂

屏迹書巢寂寞間
籃輿乘興遠登山
山雲挾雨忙飛去
不得逍遙共我閒

潘定王瑄堯

一首 數裡歸羣山小雲泚汎雨縹杏林吟

王宣王子太祖雲孫萬厯十二年襲封有修業堂崇

玉山房二稿

蘇王與學韻並有學晉蘇

潞安詩抄前編王博學贍通詩學晉魏

寒食曉行

輕軒衝曉色迢遞柳溪邊野濶羣山小雲低片雨懸杏花初
熟酒榆火乍浮煙寂歷嗚鶯處傷春似舊年

靖安王新塚

一首

王晉靖王曾孫太祖雲孫萬歷十年襲封

名山藏靖安王表秩有道氣能詩子恭懿王知婚孫
今王新塚三世俱能詩

元夜懷易海洲中丞

淡月來深院寒煙接暮天華燈明綺席綠酒醉流年孤影梅
花伴相思春草邊遙知燕市裏酬和白雲篇

穀城王常濫

一首

王吉端王孫簡王來孫英宗昴孫萬厯二十四年襲

封

冬日陳達父對飲

寒色侵池滿簾鈎捲夜長鐘疏三徑月葉散一林霜茗好詩
脾健盧呼酒力强縱談銷絳蠟縹緲坐焚香

宋食鹽

陸野

陸野

陸野

陸野

朝對劉判國臣... 餘錄... 州坐焚香

吳公... 蘇... 三... 林... 蘇... 蘇...

李曰刺殺父性論

城

王吉... 王... 王... 二十四...

明詩紀事卷二下

貴陽陳田輯

甲籤

朱安泐 一首

安泐周定王櫛玄孫

田按史稱將軍安泐素精名理延納詞人聲譽大著與中尉睦榑齊名人稱睦榑為大山安泐為小山安泐詩惜不多見

送馮參將赴陝西

仗鉞仍分陝乘時復請纓聲名歸大樹威武重長城電掣蒼龍劍風翻白虎旌塞塵當一掃萬里可橫行

朱睦㮮 二首

陸桴字灌甫號西亭周定王六世孫封鎮國中尉萬

歷中舉宗正有陂上集二十卷

胡應麟詩數明宗室攻古文詞者嘉隆間惟灌父最博洽饒著述余髫歲卽與交豫章用晦先鳴諸子勃起貞吉宗良與余酬復特久一時競爽名家未易屈指盡也

列朝詩集灌甫被服儒素覃精經學從河洛間宿儒遊奉手摳衣執經函丈受禮於睢陽許先章分句釋辨析疑義達旦不寐三月而盡其學年二十通五經尤邃於易春秋家故饒貲財僮奴數百人皆逐羸車屑麥執業自給逐十一之利其家益大起訪購圖籍請接賓客傾身遊貴顯間通懷好士內行修潔築室東陂之上延招學徒與分研席用是名聲籍甚萬歷初舉文行卓異爲周藩宗正十餘年國中大製作皆出其手修河南通志撰中州人物志中州之文獻徵焉謂本朝經學一稟宋儒古人經解殘闕放失訪求海內通儒繕寫藏弃若李鼎祚易解張洽春秋傳皆序而傳之丁丑領宗學約宗生以三六九日午前講易詩書午後講春秋禮記雖盛暑寒不輟命諸生刺舉同異撰五經稽疑若干卷授經圖及傳四卷觀陶

九成輟耕錄載前元十九帝統系作大明帝系世表一卷周國世系表一卷感建文革除記錄失實作遜國記衰忠錄五卷考史記以來諡法作較定諡法一卷合沈約吳棫韻舉正誤繆撰韻譜五卷其詩文有陂上集二十卷文尤典雅可誦有明之宗室憲園比肩間平而灌甫媿美子政洵昭代之盛事唐宋所希觀也海內藏書之富近代推江都葛氏章邱李氏灌甫傾貲購之竭四十年之力倣唐人四部法用各色牙籤識別凡一萬二千五百六十卷起萬卷堂諷誦其中圈點讐勘丹鉛歷然其子勤羹號竹居亦嗜書收藏益富余從中牟張民表鈔得其書目武林卓爾康爲學官於汲借鈔得數十帙未竟而罷汴亡之後陂上之充棟插架者漂蕩於洪流怒濤可勝歎哉

陂上答潘笠江

陂開浚野東堂接夷門道聊用安卑棲敢云慕高蹈良辰適在茲寒裳一登眺苔徑何紫紆葭洲亦窈窕嶼雲斷復連林日暖仍曜溪鳥自飛翻沙禽相叫嘯身同北渚吟情豈南窗

傲酌桂靡與歡擷蘭徒盈抱賴歌郢中篇庶以永所好
與君結靜因回首俱陳迹緬懷山中遊歲景倏已夕秋颿颿
空林澹月來寒石兀坐亦何言含情念疇昔

朱華園 一首

華園字仲叔楚國王孫有梅湖桃谿二集

廖元度楚風補仲叔敦敏好學崇禎癸未三月夢遊
異境見石壁有詩告親友曰時危矣去之可也遂隱
桃谿易名陶范公別號五湖長

送陳法瞻之留都

將軍奇俠天下聞醉餘指顧生風雲以劍爲書自神絕波掣
勁敵千人軍曩歲戰黔獲小醜拂衣里閨羞言勳小鈴蹇衛

條千里然諾真堪托生死故人急難遠相聞犯暑南行為經
紀壯君意氣為君歌翁伯于君何足多

朱承綵 一首

承綵字國華齊王孫

列朝詩集齊藩宗支散居金陵高帝子孫於今為庶
國華獨以文彩風流厚自標置掉鞅詩壇鼓吹騷雅
萬厯甲辰中秋開大社於金陵胥會海內名士張幼
于輩分賦授簡百二十人秦淮伎女馬湘蘭以下四
十餘人緝文墨理絃歌承平盛事白下人至今豔稱
之其詩亦殊清拔天迥孤帆沒江空獨雁寒所謂送
別登樓俱堪淚下者也

春暮集巨源弟羣鷗閣

客來情不淺月白樹難藏開閣驚春暮傳杯引興長水清魚
戲藻花落蜨愁香翦燭西窗裏無妨入醉鄉

朱觀樞 一首

觀樞字中立鉅野僖順王玄孫魯荒王檀六世孫封

鎮國中尉有濟美堂稿

宋弼山左明詩鈔中立所選海嶽靈秀集後附二藩詩一卷則其父子作也自序云岱宗東盤溟渤襟塹鉅野茫茫靈光蕩蕩當奎婁危室之奧固宇內靈秀之區三朝以來名家疊出大雅聿振子採成二十餘卷略述人物出處品格優劣今頗有其本簡擇頗精

梅墩

誰將庾嶺梅栽傍草玄宅一夢入羅浮覺來山月白

朱頤媿 十三首

頤媿字江亭魯荒王八世孫有市隱堂集六卷

田按江亭詩音節高亮史稱鉅野中尉頤瑒聲詩清拔所著有赤霞館集余檢江亭市隱堂集有喜聞赤

霞館得二鶴展九日集赤霞館對雨諸詩蓋同時唱和之作也江亭名不甚著余特廣爲甄錄與世共賞之

和村居感遇

一朝脫塵鞅四海任遨遊採藥尋仙去岱宗爲我留西望咸陽宮寂寞成荒邱興亡固有數貧賤何足憂歸來閉柴關編簡細研求埽石卧白雲銜盃歌四休

至後齋居述懷

昔登蘇門山獨發孫生嘯悵恨青霞人披襟可同調落日照林薄迴風吹海嶠相思轉陳迹俛仰憶悲眺

述懷

柴門無客過幽興與誰同竹色凌殘雪梅香度晚風歲時雙

醉眼天地一衰翁回首浮雲態須臾事事空

春日卧病答蚓竅兄招飲

相如多病日不逐兔園遊人惜耽詩債花憐負酒甌那堪曲
水興尙念野人儔燕子知春社銜泥去玉樓

掩門

物序秋將半西風各掩門人情向黃菊霜色悼芳蓀白日豺
狼鬪清宵鼓角喧時光須自遣對月且開樽

除夕雪中有感答一敬姪

寂寂陵谷變悠悠歲序遷檻梅融臘雪岸柳帶春煙藥餌扶
衰病琴樽送老年眼前小兒女時態鬪鮮妍

冬日感懷

嗜酒貧爲病耽詩狂作魔醉來還自舞醒後復長歌天地身
將老風塵鬢欲皤吾生今已矣歲月任蹉跎

杜陵臺餞送林長卿之金陵

臺古春深草木稠驪歌忽動使人愁雲開淮浦三山出江抱
石城二水流別後夢魂依魯甸燈前風雨看吳鉤憐君年少
青雲器正是鵬鵬奮翼秋

迎春詞

越羅新翦製春衣廣袖長紳白練垂怪底誰家遊冶子輕敲
紈扇唱春詞

絕句

茶烹竹葉宜興錦酒泛松花鸚鵡卮醉後園林遊目處陰陰

桑柘雨晴時

塞下曲 二首

邊烽夜照塞門開
漢將秋深打獵回
後騎尙屯平樂館
前軍已過李陵臺
煙塵不動紫荆關
刁斗無聲士馬閒
貂帽錦裘結束好
將軍雪裏射鵬還

海棠軒

北軒軒外春光好
點染臙脂半未開
醉倚東風似相識
挑燈載酒幾回來

朱憲燮 一首

憲燮字叔和
遼簡王植六世孫
封鎮國將軍
有哀黍

離詩

真人府

叢桂崑幽玉露寒欲探鴻寶憶劉安雲中雞犬無消息歲歲
青苔護石壇

田按真人遼王憲櫛也

朱儼鑿

一首

儼鑿字啟宇遼簡王八世孫有句曲山人詩

東灣草堂隱居

明月在天天在水水光天氣涵細縕隔鄰清杵數聲急遶屋
寒蛩一夜喧有時獨坐自垂釣無事杖藜還扣門眼前落葉
聚復散石上看雲安所論

朱棋樋 二首

棋樋字匡南建安簡定王孫甯獻王權五世孫封奉

國員亦國將軍有瑞鶴堂集爽臺稟各二卷

寄環浦鄭公

灑淚三年別論心千里同斷鴻
閩海濶落木楚天空憂世存
孤議傳經抗古風無緣從杖履
吟嘯武夷中

輓沈潯州禹文

沈約元多病如何事遠遊
一麾才欲展萬里瘴先投
茂苑猿空怨蒼梧雲更愁
旅魂招未得蕭索不勝秋

朱多燬 五首

多燬字宗良瑞昌恭僖王玄孫甯獻王六世孫封鎮

國中尉有國香集

王世貞弇州山人續彙朱宗良石蘭館彙氣清調爽
神完體舒用事切而雅入字峻而穩運思深而不刻

結法道而有餘味
筆精國朝宗藩之詩甯府為盛諸王孫以詩鳴者多

姪多熿其著者也多姪絕句清逸多熿屬對精工如
太室出雲來署裏黃河如帶挂城頭關山曉月趨三

輔鴻雁秋霜度九河路經軒后臨戎坂山接高歡避
暑宮翩翩爾雅無紈袴習氣

書史會要朱多熿以辭賦名草書宗孫虔禮筆法茂
美

列朝詩集多熿博雅好修與多燿齊名晚益折節有
令譽掖垣薦堪宗正者於南昌首舉宗良後病痿不

廢吟咏鴻聲亮節信朱邸之雋也
田按明藩王之工詩者當以秦簡王誠泳為稱首王

孫之工詩者當以瑞昌中尉多熿為稱首王弇州云
每得中尉一番詩輒復一番奇進才情融美格意朗

暢朱邸中那復有斯人自非盜美語中尉詩初名石
蘭館彙弇州題為國秀又改題國香見弇州國香集

序

贈余無旦並寄胡茂承

分藩豫章郡地勝有餘樂爽氣浮雲峰江流帶高郭心賞希
良朋毫素獲所托胡生實燕婉十載阻京洛每睹鴻雁賓永
歎遠行客余子璠璣美抗迹戀邱壑載誦招隱篇清風振叢
薄

蘇公祠

西蜀藏名士東湖托隱居野雲寒織屨春雨曉栽蔬心爲踰
垣苦才甯濟世疏悠然江海外不報故人書

滕王閣

覆檻飛甍古閣雄疏簾高棟廠天風彩雲尙想霓旌駐嬌鳥
如悲翠琯空江送波濤來浩渺雨移巖岫入溟濛丹梯更峙

巴山外詞客千秋興未窮

玉隆萬壽宮

西山迢遞隱仙宮誰信人間有路通
忽覩樓臺蒼靄外似聞雞犬白雲中
石幢苔滅三天字磴道霜凋百尺楓
靈跡祇餘丹井在清秋吟望意無窮

酬羅敬叔

病裏送君遊白嶽歸來對我惜蒼顏
移家只是湖邊好莫問茱萸第幾灣

朱多炆

八首

多炆字貞吉弋陽僖順王曾孫甯獻王六世孫封奉國將軍卒後私諡清敏先生有五游勸游諸集

姚旅露書豫章王孫貞吉負時名慕孫太初亦易姓名曰來相如字不疑浪迹吳越其詩如帆衝山果落棹惹浪花腥野竹雲千頃田桑雨一犁野澗蘋花積田家芋葉香蠟屐黏香絮單衣繡雨痕山泉供水樂秋葉逞春容又七言如林連北郭藏春色水過東家作雨聲皆興到語

筆精貞吉王孫過餘干詩云餘干城頭雲泊天琵琶洲下水如弦推蓬理詠隨州句落日平沙似往年謝在杭宿弋陽云羣峯迴合俯清溪寂寞荒城古渡西惟有女墻秋月只在只今猶照夜烏嘯二詩皆用劉隨州句畧無痕迹

書史會要貞吉詩才警敏行草宗米南宮雜以古字自成一體

畫史會要多炷精繪事見古人墨蹟一再臨之如出其手山水得二米家法寫生更妙

田接貞吉王孫詩才清警徐興公稱其絕句固是玄賞

寄邱二十二謙之

邱郎一官一再左手板三投三不可進退艱如躑躅羊功名

澀似葳蕤瑣憶昔與子初結歡觴詠澣濯章江干別來忽下
閩中命五馬重歌蜀道難閩中君家舊治域父子分符如畫
一耆舊摩挲去後碑少年捃拾毛中蹟縱有詩名天地間那
能相見一開顏我擅秦聲君楚舞醉望城頭千仞山君當彊
仕不得意我尙沈冥未知止與君各自鬪身強四十頭顱已
如此

遊百丈山聞余無旦過豫章闕展待先此奉寄

我住浮雲宮君來天子障尋山尋水各逍遙看樹看雲重惆
悵谷口行歌日暮還杖藜何處不青山莫題鳳字朱門外且
聽鸞音半嶺間

春日懷張羽士

言旋南嶽駕又作薊門行尊酒不爲別河梁空復情一官羈
萬里十口寄孤城日暮春雲起相思處處生

問魏甫姪疾

海上何人說禁方科頭長似嬾嵇康穿林雨暗茶煙綠隔院
風微藥草香轉向病中憐故舊誰從身後定文章閉門不問
春多少靜看飛花墜滿床

撥悶

雨暗春城十萬家強指髭几到棲鴉峭風欲閣遊人展吹盡
牆頭柰子花

送梁傳之從襄陽將母南還

夫人城外漢江平逐子南迴五兩輕路出鄢邨頻雨雪槎頭

魚賤筍初生

送王姬還芝城

蘼蕪芽碧柳絲黃
來往扁舟就沈郎
一掬宮亭清淺水
凌波不怨洛川長

湖口縣

湖水澄清江水渾
江煙湖靄易黃昏
請看湖口江心月
一片

寒光照縣門

朱多燿

一首

多燿字用晦瑞昌榮安王曾孫甯獻王六世孫封奉

國將軍有朱用晦集

田按用晦因南昌余曰德入七子之社王元美作續五子詩用晦與焉宗良貞吉得交元美自用晦始元

美所謂豫章諸王孫賴足下先驅異時風流不減鄴下也

滕王閣

滕王閣倚楚江干公子乘春一駐鞍北去波光浮錦席西來
山色擁雕欄冥鴻萬里飛雲斷芳草三洲落照寒已是大夫
工授簡賦成兼使和人難

朱多燠

一首

多燠字知白甯惠王第四子石城恭靖王奠堵之玄

秋日社集

躡步出郭門涼沙朗朝日迤邐入叢林花宮眩丹漆巍巍豫
章臺萬木四排比

音玉從白香山讀

高讌集友于討論及刊述清風

吹素襟古調和瑤瑟會心豈在遠快意亦多術遙睇天際帆

翩翩若風乙

靜志居詩話南昌郭外有龍光寺萬歷乙卯二月豫章詩人結社于斯宗子與者十人知白之外則宜春王孫謀劉文翰瑞昌王孫謀雅彥叔石城王孫謀瑋鬱儀謀圭禹錫謀珩誠父謀焯藩甫謀墾辟疆建安王孫謀穀更生謀聖禹卿謀劉緝其詩曰龍光社草

朱謀瑋 四首

謀瑋字鬱儀石城恭靖王來孫甯獻王七世孫封鎮國中尉萬歷二十二年管理石城王府事卒私諡貞

靜先生有枳園近稿

鄭仲夔耳新詩有集唐集古余友朱鬱儀諷古十首乃更集諸子鎔鑄之巧妙極自然又閏三月飲龍沙詩且極天縱娛相將傾桂醕蓋歷家謂閏月為天縱也鬱儀博綜多聞著述之富百倍中壘每館閣中遇

故事隱僻者貽書相問裁答如響著書百有十二種
手自繕寫稿至數易易簧前二日猶與諸子說易指
示詩文宗尚是夕有星光大如斗墜里中棲鳥皆驚
及卒南州人士私謚貞靜先生
周亮工書影西蜀楊升庵太史著書至二百餘種豫
章朱鬱儀中尉著書至一百十二種當時曾未聞有
茂陵之求張天如雖一時名流然無多撰著當時至
見之章奏求其遺書人有幸有不幸如此

滕王閣

銀牀冰井久荒蕪豈若君王觀閣殊六月凌歊無暑氣千年
選勝甲名都河山雨過明如畫草樹煙消綠似鋪多少詞人

憑檻意依然汾晉一碑孤

元夕曲

三首

一夜春歸花柳新笙歌五里踏朱塵停車試問來遊女誰似

天河欲渡人

六十餘年白髮生
眼中元夕幾回晴
江南不是無燈火
取盡脂膏照上京

少年不解畔牢愁
月夕花朝結伴遊
今日故人零落盡
祇留春色到南州

露書朱鬱儀元夕曲皆以舊題寫新意所以爲佳

朱謀謨 三首

謀謨字康侯更字公退宵獻王七世孫有羔雁淹留

蕪城中車四集

露書南昌王孫多稱詩而康侯拔出康侯刻稿甚多
余愛其送謝在杭分守大理詩南詔分司擁傳賒嚴
城保障建高牙漢兵據險皆屯柵蠻族依巖卽住家
布穀曉曉郵店樹刺桐春發訟庭花君恩懷遠多寬
政公暇吟詩早放衙
列朝詩集公退少而英敏讀書修詞踵鬱儀之後塵

結廬蛟溪躬耕賦詩郊居耕釣之作詞旨婉約有唐
溫許宋陸游之流風

舊宮詞

女牆橫截鍾山麓子城十里空其腹老宮監守西上門日見
宮中春樹綠當年玉座遷北平燕麥多從輦路生太液煙波
空弔影未央鐘鼓不聞聲二百年來萬民樂文武諸司皆卧
閣當年內庫埽梁塵六月重門啟魚鑰市人身替羽林軍偷
見蓬萊五色雲枯沼頽垣容易入千門萬戶杳難分驚看墀
草潛狐兔武英殿接西宮路赤闌楊柳樹長生畫棟芙蓉花
尚吐別有銅駝扉半開人傳高后燕居來五龍蟠結朝真閣
七寶莊嚴禮佛臺寂寂文牕罨蛛網至今海燕巢於上籥口
銜將紫陌泥飛身立在銅仙掌日暮中官點禁兵周廬依舊

閉重城宮樹鴉唳金瑣下年年只放內家行

甲寅春日江村卽事

自喜幽居耳目清閒中歲月與天爭占風網客知魚信較雨
田家驗鵲聲梅潤上絃琴緩柱草香侵局奕開枰沙邊引步
看流水何處昏鐘報曉晴

金陵雜咏

南國金湯據石頭千年人說帝王州驚聞戰士屯朱雀枉殺
將軍怨白鳩風煖香車盈廣陌月明絃管在高樓傷心一派
秦淮水處處垂楊似莫愁

朱謀堯二首

謀堯字魏甫石城王孫有享筭集六卷

田按魏甫與從弟佳父詩合刻為連枝集魏甫詩五
言如一別幾黃葉相看兩白頭七言如樹頭反照寒
鴉色花裏殘春倦鳥聲四馬路盤黃葉出大江天與
白雲遙山將暝色疏煙接樓射江光返照來秋氣中
人雙袂薄雨聲入枕一燈殘滿簪華髮銷塵事一枕
青山檢道書城回沙口藏山寺水落江心吐石灘行
邊錦樹粧秋色夢裏青山薄宦情皆佳句也

六子詩 錄二

烏衣羣謝遊如君固名曹歎鳳本千仞稱驥豈一毛風流不
在茲雪曲誰為操手持五嶽圖欲將訪盧敖 貞吉宗叔

吾宗有大阮國中稱達賢興至弄柔毫勢若銀鈎連入望鬱
紫氣在聽聞朱絃往往出佳篇何人堪當前 宗良宗叔

朱謀境 四首

謀境字佳父石城王孫有擊轅稿六卷

田按佳父詩瓣香宋人於陸放翁爲近

春日閒居

門外雙溪引城邊一徑斜春光欺病客山色戀貧家高樹留
殘照東風過落花晝長除鳥語庭院寂無譁

寄答鄔汝翼山人

姓名何處得君知一札經年愧報遲懶去已成中散癖詩來
應作郢人疑各天明月三秋意萬里西風兩鬢絲搖落此時
無以贈白雲江上不堪持

春日閒居

心死如灰不復然閉門踪跡儼遊禪課兒種樹娛衰日與客
看花憶舊年酒熟有時還自酌詩成無意向人傳閒居一任

春來去又聽鶯聲到耳邊

春日感懷

無復重調綠綺琴關情誰聽白頭吟難乾薄俗千行淚空碎

窮交一寸心倚杖園林鳴鳥變閉門風雨落花深感時對酒

那成醉人老春殘總不禁

朱謀暉

二首

謀暉奉國將軍多炆子有集

列朝詩集謀暉效其父變姓名為來鯤字子魚出遊

三湘吳越間有集行世湯若士為敘

露書來子魚貞吉王孫長公也喜游好事者選其詩與孫太初貞吉謂之明宗三逸

白下集沈生子明府席上賦得春草

芳杜奪幽色秦淮客路遙青連邀笛步綠鎖賽工橋柔雨生

三徑殘煙認六朝夢歸南浦裏幾箇別魂銷

疾愈寄友作

深冬惜病顏幾日望春還門外草初出窗中人轉閒餘生聊
住郭不死會尋山待到桃花發相期天姥間

朱謀埤 一首

謀埤甯國王孫

登滕王閣

帝子杳何處樓臺猶大堤江清二水合日暝眾山低畫棟生
蛛網雕甍有燕泥不勝懷古思春色遠萋萋

朱統銓 一首

統銓字夢得中尉謀埤子崇禎甲戌進士官行人

黃雲師江西人物志統銓詩淡遠高古稿燬於兵不傳

靜志居詩話明初舊典宗室子不與內外銓除後因御史李日宣等所請援祖訓換授之法言皇族宜通

仕籍得旨允行秦王孫子斗詩云爵人本至公立法無頗偏大訓手自訂百度何森然郡王有孫子所司

驗才賢換授準任用升轉遵常銓諒哉二柱史抗章排拘攣先帝展科目今皇命試官椅桐委斷壑被以

朱絲絃蒟驢在外殿策以珊瑚鞭蓋紀其事也天啟辛酉晉藩慶成温穆王表桐之曾孫慎鋈始舉辛酉

山西鄉試明年壬戌賜同進士出身至崇禎戊辰甯藩瑞昌王孫統鈿由進士改庶吉士自後甲戌則蜀

藩奉鉏甯藩統銓銓謀璋子也丁丑則甯藩統鑽統銓庚辰則周藩朝壘在卸甯藩統銓癸未則代藩鼎

娑廷壻甯藩統鎬議汴皆以宗支取甲科

滕王閣留別同社

春風吹雁去南天又促孤縱遠入燕高閣喜從名士飲輕裝
仍附賈人船江花伴我程千里雲樹添君賦幾篇只有詩情

元不隔相思能到彩毫邊

朱統欽 一首

朱統欽甯國王孫

晤茶山寺僧

因緣初地三生石問訊名山四品泉
僧借茶經高說法客依蓮社近
逃禪清空翠滴銀床滿爽氣苔涵紫筍鮮
塵界黎元消渴甚願將甘露灑無邊

朱統畛 一首

朱統畛甯國王孫

過東林訪三昧法師

偶來看瀑布隨意過東林
問法蓮花白安禪竹葉深
泉流千

壑響雲定一潭陰嘯詠清溪上翛然淨俗襟

朱容重 一首

容重字子莊甯獻王九世孫封奉國中尉有初吟草

張庚畫徵錄子莊隱居南昌蓼洲善蘭竹小品

輓徐巨源先輩 無數

亂後誅茅構草亭山中閒散久窮經文章自我開生面寰海
推君作典型夜雨暗淒高士宅寒雲低掩少微星清尊無復
黃花約極目何堪涕泗零

朱盾梢 三首

盾梢字遜軒陵川王孫有集

七哀詩 有引錄二

萬曆三年甲戌冬宣大修邊三晉受役民兵四千餘人而死是役者千五百有奇乃爲夫婦之詞凡七章命曰七哀取古題以記今事董斯役者可聞而念之也

長城萬里連雲開去年曾築今已頽黃沙滿眼更何處驅逐遠過單于臺前負土囊後騎催腹空肉破誰能來嗚呼父母不我哀

朔風倒吹天雨雪杵聲橐橐何時歇別時相約秋早歸豈料無衣骨將折人生有命向誰說河水濺濺爲嗚咽嗚呼南望心腸絕

擬閩仙絕句

雜樹已秋風空山又斜景杖策不逢人獨行潭底影

心顯錄

四溟詩話遜軒子曰凡作詩貴識鋒犯而最忌偏執偏執不惟有焦勞之思且失詩人優柔之旨如賈島

無文骨

獨行潭底影其詞意閑雅必偶然得之而難以句匹當入五言古體或入仄韻絕句方見作手而鳥積思

殿風回

三年局於聲律卒以數息樹邊身為對不知反為前句之累因勉成一絕云云遜軒博學嗜詩志在古雅

小好意

且得論詩之法擬閬仙一絕不下唐調其頓悟也如此

朱盾杌 一首

盾杌字敬軒清源莊簡王曾孫有重瞳老人詩十二

卷

四溟詩話敬軒詩冲澹自然

次栗太行枉顧韻

城隅葺小軒車馬不聞喧邱壑元規興蓬蒿仲蔚園君詩清

可挹吾道拙能存何似歲星隱常依金馬門

朱楨楨 一首

楨楨字誠軒楨杵弟

石山子

累石宜精舍憑虛無古今悠然倚杖興重以愛山心地轉仇
池穴天移王屋岑主人得幽趣何處更登臨

朱恬焮 一首

恬焮字達菴沁水莊和王叔子封鎮國將軍有達菴

集

列朝詩集恬焮子輔國將軍瑛圻與瑛琬瑛瑠瑛瑛
四人結社日課以詩藩國於是稱多才矣

同玉源宗王過吳江郡藩別業

卷二
六
霽日風光麗梁園草木深鶯歌催酌酒魚樂聽鳴琴移席臨
花鳴行廚傍竹林賢王有佳興留客正慇懃

朱瑛圻 六首

瑛圻字京甫恬皖子封輔國將軍有怡真亭稿

田按京甫詩多擬古妙合音節沁水王孫當首屈一指

宛轉詞

秋夜長碧水芙蓉香錦囊瓊佩爲君解象籠玉軫爲君將歌
宛轉宛轉淒以清願爲滄波月夜夜舟中明

夜已深幽怨繞清琴渚亭斜月半江色涼風淅淅哀猿鳴歌
宛轉宛轉愁君去願作琴上絃朝朝在君御

大堤曲

清江覆垂柳日暮大堤頭堤上繁華子春風極冶遊解珠邀
漢女戲馬入青樓誰見煙波晚偏令估客愁

春日行

四運紛鱗次寒暑亦相循元冬聿云暮忽焉代青春青春始
入東郊裏一日芳菲幾千里已看幽谷出鳴鶯復見芳園映
桃李桃李歲蕤滿故枝垂楊旖旎拂金隄南橋公子乘春興
南浦行人恨別離南浦南橋望何極士女春遊遊不息香車
七寶度春風駿馬千金踏春色春色感人深春風蕩客心春
日行將暮春愁不可禁若有人兮婉清揚弄白日兮臨綺窗
感標梅之欲盡悵佳期之不常託春心於芳草結春思乎垂
楊皋有蘭兮隰有杜懷佳人兮心獨苦惜嫵婉之莫同悲年

華之將暮恐鷓鴣之先鳴芳意萎兮靡顧與君願作雙飛鸞
比翼逍遙乎天路

擣衣曲

空階秋色慘寒逼授衣時搗練勞清夜調砧動遠思力隨斜
月盡聲逐晚風悲七月邊城雪閨中寄已遲

賦得葛巾

生平甘恬素奇服從燕私製巾翦絺綌澆酒還著之晚沐挂
薜荔曉出窺清池優游泉石上珥貂徒爾爲

朱瑄一首

瑄字純甫沁水莊和王孫封輔國將軍有玉田集

步虛詞

馭鶴辭三島凌颿入九天衣輕披翠羽劍古佩龍泉紫氣呈
金籙丹霞絢玉篇遨遊過帝闕容與木公前

朱瑛琬 一首

瑛琬號玉溪沁水莊和王孫封輔國將軍

賦得採桑秦氏女

青陽屬蠶候采采及桑柔秦女新粧出光輝動陌頭葉低嬌
漫摘樹隔語還羞自有金貂壻空勞五馬留

朱瑛瑛 一首

瑛瑛號龍洲沁水王孫封奉國將軍

送傅逸人遊關中

山人不可留歸路思悠悠仙掌丹霞出函關紫氣浮猿嘯秦

樹晚雁度隴雲秋華嶽如堪隱吾將從爾遊

朱效鏃 一首

效鏃字仲凝理圻子封奉國將軍有匪莪元攬齋盤

秀山房等集

杪秋交光禪師程心蟾逸人見過東園

開士投蓮社幽人就竹關茶煙凝晚樹木葉下寒山定水禪
心淨歸雲客思閒清言塵境外何幸日追攀

朱碩爨 四首

碩爨字孔炎唐定王檀六世孫封鎮國中尉有巨勝

園集

弇州山人續稿孔炎詩調和致清高處可步武摩詰
下亦不失錢劉

田按孔炎博雅好收藏書畫鼎彝羅列座右嘗出所藏唐人理帛圖東坡山谷像與王元美品題鑒別精審不愧摩天王文孫詩亦才藻翩翩在甯國王孫宗良之次

過族祖姑壽陽君主墓

高阜城西墓荒涼卧石麟青山猶似黛金粉自成塵花落梅粧在鶯嗁竹淚新向來蕭館月不照夜臺人

寄歐楨伯水曹

聞醉金陵酒高歌李白樓書來牛渚夕賦罷鳳臺秋徑竹裁青簡江花照綺裘從來何水部頭白尙風流

山中送龔美

龍伯祠前白日斜山中七日飯胡麻送君最愛春潭水流出東風玉礪花

東風金谷園

花落樓空委翠塵千秋明月恨長新西風原上羣芳歇獨有

芙蓉似美人

朱器封

二首

器封字子厚碩爨子封輔國中尉有巢園集

弇州山人續稿子厚王孫天質穎秀神明煥發雖生王家而早探竹素不染愛樂故所撰朗朗郁郁乃爾

王世懋奉常集子厚樂府諸解莽莽蒼蒼絕無今人一語五七言律用事與博間有未融

均州樂

臨江賈人黃篋船漣漣青油篙刺天下船上岸買魚酒二八

當墟誇數錢煙縈羅幌春將晚白日銜山不思返珠簾紅袖

影傒俄樓上明粧樓下波沙棠樹上嬌春鳥月出平江齊唱

歌

寄田子藝

芙蓉搖落寄何遲
遠道猶涵玉露滋
山遠穆陵秋矗矗
月明澗水夜離離
繡經臺畔一燈寂
搗鼓樓前雙棹悲
無奈西風吹病骨
因君將賦五游詩

朱常法一首

常法字幼良益端王四世孫

田按益藩王孫常淞有防露館稿如三春過大半半在雨中過落葉如秋雨聽來不耐愁姚園客稱其酸楚有致附見於此

山行

山谷風多花亂飛
飛花帶露溼人衣
晨炊茅店煙光動
散作

浮雲入翠微

朱慈愨

一首

慈愨字火西衡恭王六世孫崇禎壬午舉人

山左明詩抄火西饒學問善詩歌闖寇陷青州變姓名南遊造次必持一觚因自號大觚道人

邱使君招同遊焦山

枯木堂中宿重過不計年烏嘯京口樹月冷海門船雲馭通
三島潮音應四禪如何終碌碌尋勝轉無緣